

Pr. 18002. 6

NUM VINCTURA AORTAE ABDO-
MINALIS IN ANEURYSMATE IN-
GUINALI ADHIBITU FACILE AC
TUTUM SIT REMEDIUM?

dissertatio inauguralis chirurgica,

QUAM

consensu et auctoritate amplissimi
medicorum ordinis

in

literarum universitate caesa-
rea dorpatensi

ut gradum

DOCTORIS MEDICINAE

obtineat,

loco consueto publice defendet

N I C O L A U S P I R O G O F F.

DORPATI LIVONORUM.

TYPIS J. C. SCHÜNMANNI, TYPOGRAPHI ACADEMICI.
MDCCXXXII.

Imp r i m a t u r

haec dissertatio ea conditione, ut, simulac typis excusa
fuerit, quinque exemplaria collegio ad libros exploran-
dos constituto tradantur.

Dorpati Livon. die vi. Mens. Julii M D C C C X X I I I.

Dr. Theoph. Franc. Immanuel Salmen,
h. t. Ord. Med. Decanus.

4-2A

14812

„Dans les sciences émettre une opinion,
,,on, croire n'est autre chose, qu'ignorer.
,,En effet qu'exprime-t'on au fond, en di-
,,sant: je crois, je pense, mon opinion est,
,,que tel phénomène se passe ainsi? Cela si-
,,gnifie seulement je soupçonne, je conjecture que la chose a lieu de telle manière.
,,Or, quand on soupçonne, quand on fait
,,des conjectures, on ne sait pas. On
,,pourrait dire avec assez de justesse, tu
,,crois, donc tu ignores. Toutes les fois
,,qu'un auteur donne son opinion, sa ma-
,,nière de voir sur les phénomènes naturels,
,,il fait un aveu formel de son ignorance;
,,c'est comme s'il disait: Je ne sais pas la
,,chose dont je vais vous parler; mais voi-
,,ci mes conjectures à son sujet. Si l'on
,,était bien persuadé de cette vérité, on s'évi-
,,terait des recherches pénibles pour savoir
,,ce qu'ont pensé tels ou tels auteurs sur tel-
,,les ou telles questions. Les sciences ne se
,,composent pas de ce qu'ont pensé les hom-
,,mes, mais de ce qu'ils ont découvert,
,,c'est-à-dire, de ce qui est.“

MAGENDIE.

Miraretur forsitan, qui audiret, me quaestio-
nem, quae jam dudum observationibus et
experimentis soluta esse videatur, solvendam

suscepisse; tamen si quis ipse pagellas has pati-
enter perolvvere velit, judicabit reprehendendus
ne sim, nec ne, quod in quaestionem (ergo in
dubium) vocaverim: *num revera vinctura Aor-
tae abdominalis perfici possit et quanto vitae
periculo.* Caeterum, Candide Lector, argumenta,
quae opusculum hoc continet, ut extra omnem
dubitacionis aleam posita esse, nequaquam cen-
ses te obsecro; etenim multum adhuc laboris
et temporis mihi opus est, ut pericula, quibus
nituntur, omnibus numeris absoluta evadant.
Veritate permotus, quam verba supra adducta
exprimunt, *facta potius quam opiniones et
hypotheses* (*ignorantiae asylum*) in medium
proferre conatus sum.

Verbum demum *de ordine*, quem secutu-
rus sum, adjiciam. In describendis chirurgicis
operationibus Auctores saepissime laborem im-
pendunt accuratissimis enumerationibus magni-
tudinis, formae, directionis etc. incisionum, sed
sicco pede praetereunt ea, quae multo majoris
sunt momenti; non attendunt scilicet Lectoris
animum ad structuram, situm, functionem or-
ganorum, quae subjiciuntur operationibus. No-
tum autem est, chirurgicam encheiresin ple-
rumque nihil aliud esse, nisi viam, quam ad
varia organa attingenda mutandaque aperimus.
Sed de via hac facillime nos decedere possu-
mus, si regionis topographia parum nobis cog-
nita est, et organon, quod jamjam attigimus,
convenienter mutare non alius quisquam potest,
nisi status ejusdem organi immutati gñarus. Ut
itaque propositum et necessitas cuiuslibet ope-
rationis, eaque, quibus stipatur, phænomena

plene et complete exponantur, natura, situs,
alterationes organi morbosae, inter se conferan-
tur, oportet.

Videntur itaque mihi *quatuor res*, ad
quaestionem de Vincturâ Aortae Abdominalis
solvendam necessariae, hic praemittendae, ni-
mirum:

- 1) Clara et distincta notio *de structurâ
et functione* hujus arteriae.
- 2) *Situs* ejusdem quo *ad partes vicinas*
accuratissima indagatio.
- 3) *Morbosarum alterationum*, quae Vinc-
turam ejus necessariam reddunt, justae
notitiae.
- 4) Cognitio denique *vis*, quam *exserit li-
gatura* huic arteriae applicata.

I.

De *texturâ et functione* Aortac abdomi-
nalis.

Id solummodo leviter tangam, quod argu-
mentum nostrum attinet.

Aortam abdominalem adinstar omnium cor-
poris nostri arteriarum

1. Tribus textibus membranaceis compagi-
natam esse, notum est. Quilibet horum propriis
characteribus a caeteris distinguitur. *Cellulo-
sum* nimirum (tunicam externam) magnam di-
latationem admittere; *flavum* (tunicam medium)
fibris transversis conflatum, maxima fragili-
tate ac elasticitate, *serosum* deinde (tunicam
intimam) omnibus serosarum membranarum pro-
prietatibus gaudere, experientia constat. Aor-
ta abdominalis igitur offert tres, primo aspec-
tu sibi contrarias, proprietates sequentes: ex-

tendi potest, admodum elastica est, simulque fragillima.

2. Chemicae ac anatomicae indagationes probant, Aortam abdominalem fibrâ musculari, ergo et irritabilitate aliâque musculari indole prorsus carere.

3. Nervos Aorta abdominalis ex Sympathico magno accipit, nimirum ex plexibus semilunari, aortico, mesenterico, hypogastrico aliisque. Sensibilitate igitur in statu normali omnino caret. Ramusculi nervei simul cum vasis vasorum per tunicam cellulosam penetrantibus praecipue in textu flavo Aortae distribuuntur. Injectiones anatomicae ex minimis Aortae abdominalis vasis nunquam in cavitatem ipsius exsudantur.

4. Aorta abdominalis, *functionis* ratione habita, est tubus elasticus, qui directe e corde ad extremitates inferiores, viscera in cavo abdominis posita, ad parietes cavitatis hujuscet ad medullam spinalem sanguinem transfert. Hic sanguinis decursus secundum leges mere hydraulicas absolvitur atque alio modo non jucatur, nisi vi Aortae ejusque ramorum elasticâ. Multum etiam ad hunc finem confert ea mirabilis arteriarum indoles, tempore recentiori praeprimis reperta, quod vis contractionis earum vim easdem dilatantem XV millimetria mercurii superet.

5. Aortam abdominalem propterea ad organa maximi momenti in corpore nostro referre oportet, quod quasi receptaculo inservit, ex quo vasa capillaria cruorem hauriunt ad viscera abdominalia, extremitates et medullam spi-

nalem nutritandas incitandasque, nec non ad sustinendas horum organorum secretiones.

6. Rami Aortae abdominalis inter se invicem et cum ramis ex Aorta Thoracica et ex Arteriis Iliacis aliisque prodeuntibus (ergo supra et infra Aortam abdominalem oriundis) numerosissimas ineunt anastomoses. Notatu dignum est, lumine omnium horum ramorum trunci ipsius Aortae lumen superari. Si igitur trucus iste compressionem obstructionem forte fortuna passus fuerit, anastomoses surculique ramorum minutissimi illico succurrerent. Praeterea periculo constat, minores arteriarum surculos celluloso solummodo textu conflatos esse, extensioni igitur magnopere patere. Communiant autem inter se rami Aortae abdominalis dupli modo, aut *indirecte*, scilicet vasorum capillarium ope, aut *directe* per mutuam ipsorum inoculationem.

Ex hisce omnibus colligimus haec tria collaria:

- 1) Quoniam textura et indoles Aortae abdominalis eadem sunt ac aliarum arteriarum, vas hoc devinctum easdem mutationes subeat necesse est, ac omnes aliae in corpore nostro ligatae arteriac.
- 2) Quoniam functio Aortae abdominalis nobis jamjam est coguita, nos *a priori* exponere posse oportet omnia, quae arteria bac obstructa, in lucem proditura sint phaenomena, ut: *congestio sanguinis ad cor, nutritio, secretiones et incitatio organorum chylo- et uro-poëticorum, medullae spinalis atque*

extremitatum inferiorum omnino retardatae.

- 3) Cum vero praeter truncum Aortae abdominalis ipsum adhuc alia vasa lateralia adsint, quorum ope partes supra hanc arteriam sitae cum partibus infrapositionis communicant, sanguis, impedimento quolibet in trunco occurrente, facili negotio ex superioribus per vasa haec collateralia inferiora versus iter faciet.

II.

Situs aortae abdominalis quo ad partes vicinas.

Imprimis notandum est, eam Aortae abdominalis portionem, quae supra secundam vertebram lumbalem decurrit, cultro chirurgico omnino esse inaccessam; etenim cruribus diaphragmatis tecta, variisque gravissimis organis, ut ventriculo, pancreate, plexu solari, obsessa, duos hic emitit eximios ramos: Coeliacum et Mesentericum superiore, qui exiguo a se invicem distant intervallo et multiplici reti nervoso ex gangliis semilunaribus, plexu coeliaco et mesenterico superiore sunt intricati. Restat igitur modo spatium inter secundam et quartam quintamve vertebram lumbalem, quod vas nostrum occupat: altera scilicet Aortae abdominalis pars, quae inter arteriam Mesentericam superiorem et bifurcationem ipsam interest.

Haec posterior Aortae abdominalis portio, quam *Iliacomesaraicam* nominabimus, 4 fere pollices anglicanos in homine adulto longa, sex, interdum octo, arteriis originem praebet:

Mesaraicae nimirum inferiori, Sacrae mediae et quatuor aut sex arteriis Lumbalibus.

Portionis Iliacomesaraicae Aortae cultro anatomico inquirendae duplex est ratio. Ut utraque intelligatur, reminiscamur peritonaeum, quod posteriore parietem cavi abdominis vestit, ex utroque latere columnam vertebralem versus anterius petere, inter utramque laminam suam spatium triangulare relinquere et dein jam mesenterium formare. Spatium hoc, mediastini cavo in pectore analogon, arteria nostra, vena cava inferior, ductus thoracicus et rami nervi Sympathici implet. Reminiscamur etiam, peritonaeum textu modo celluloso admodum laxo parietibus abdominis adhaerere, facili itaque negotio a partibus adjacentibus separari posse. Exinde patet, nos duplice via spatium istud attingere posse: aut unam quamlibet laminam serosam, quibus constat, secando, aut a latere intrando, sacco peritonaci integro relicto, tantummodo a musculis abdominalibus ipsum separantes. Verbo, *cum incisione peritonaci, vel sine eadem.*

Mediastini cavum istud *abdominale*, figuram triangularem referens, cuius basis columnam vertebralem spectat, non plane rectam directionem habet, sed a sinistro latere parumper dexteriora versus inclinatam. Posteriora versus itaque columnam vertebralem, ad latera laminis peritonaei, quibus ipsum formatur, ad anteriora conjunctione harum laminarum (id est mesenterio) limitatur.

En quid in tribus quatuorve cadaveribus, utraque praeparandi ratione usus, inveni:

Prima praeparandi methodus. Cayo

abdominis sectione muscularum circulari aper-
to, intestinis tenuibus dextrum versus latus re-
clinatis, conspiciuntur:

- 1) Colon transversum, 2) Colon descendens,
- 3) Flexura sigmoidea, 4) Lamina mesenterii si-
nistra (mesocoli transversi et descendantis con-
tinatio), nunc tenuium intestinalorum remotione
tensa; trans tenerrimum ipsius textum arteria
Aorta, glandulae lymphaticae, surculi nervae et
intestinum duodenum pellucent ac contrectando
percipiuntur. Lamellam hanc serosam si per-
scideris, vulnerisque ora distracteris, sequentia
invenies:

1. *Telam cellulosam* laxissimam, cum ve-
sicularis adiposis glandulisque lymphaticis mixtam.
2. *Truncum arteriae Mesentericae inferi-
oris*, duos fere digitos transversos adaequante, et obliquā directione a superioribus ad inferio-
ra et sinistrorum, mesocolon versus petentem.
Bene est animadvertisendum, truncum hunc ante-
riori Aortae superficie contiguum esse, atque
modo cellulosae ope separatum. 3. *Portionem
iliacomesaricam* Aortae ipsius denudatam
et origine arteriae Mesentericae inferioris in
duas partes aequales quasi divisam, *superiorem*
et *inferiorem*. Nunc de utrāque seorsim.

*Superior pars portionis Iliacomesarai-
cae Aortae*, quae inter origines arteriarum
Mesaraicarum est, ad partes vicinas quoad si-
tum sequenti modo se habet:

- 1) Ad dextrum ejus marginem Vena Cava
inferior procedit et fere pollicis unius in-
tervallo ab ipsa separatur.
- 2) Intervallum hoc tendinosa cruris dia-

phragmatis insertio, tela cellulo-adiposa
et ductus thoracicus implet.

- 3) Sinistrorum musculus Psoas magnus situs
est, a sinistro margine Aortae etiam spa-
tio celluloso sejunctus, in quo locum ha-
bent nervi Sympathici ganglia surculique
quibus praebent originem. Et Sympa-
thicus igitur nervus ab hac portione Aor-
tae sat magno intervallo distat.
 - 4) Mox infra originem Mesentericae superi-
oris, antica Aortae superficies a Vena Re-
nali sinistra tegitur.
 - 5) Inter venam Renalem et arteriam Mesen-
tericam inferiorem eadem arteriae nostrae
facies decussatur cum intestino duodeno,
quod obliquam a superioribus inferiora
versus et sinistrorum habet directionem.
Intestinum hoc, mesenterio carens et con-
tinuatione tantummodo mesocoli trans-
versi obtectum, directe parietibus Aortae
applicatur.
 - 6) Tota denique tunica cellulosa hujus por-
tionis Aortae numerosissimis surculis ner-
veis ex plexu mesenterico superiore ac
aortico, ramusculisque plexum versus me-
sentericum inferiorem tendentibus, est ir-
retita.
- Pars inferior portionis Iliacomesarai-
cae Aortae.*
- 1) Vena Cava inferior dextro hujus por-
tionis margini jam plane contigua est et
modo fibrocellulosa lamella plus minus
forti ab eo sejungitur.
 - 2) Ductus thoracicus ad tertiam usque verte-

bram lumbalem in posteriore Aortae facie decurrit.

- 3) Sinister hujus portiunculae margo, quo inferius ad angulum sacro-vertebralem descendit, eo magis ad nervum Sympathicum appropinquatur, nonnullarum tamen linearum spatio ab hoc sejunctus.
- 4) Anterior facies trunco arteriae Mesentericae inferioris tegitur surculisque ex nervi Sympathici plexu ejusdem nominis. Praesertim duo aut tres ramuli haud exigui inter arteriam Mesentericam inferiorem et Aortam ipsam intersunt.

Posterior portionis Iliacomesaraicae Aortae paries directe, textu solum fibrocellulari intercedente, corporibus vertebrarum lumbalium applicatur.

Ut vero secunda praeparandi methodo ad arteriam perveniamus, musculi abdominales etiam plaga circulari secentur, membranaque serosa denudetur, oportet. Nunc autem textum cellulosum, qui partibus adjacentibus faciem sacci peritonaei externam adnectit, dilacerando, facilis negotio columnam vertebralem attingimus. Quo vero magis peritonaeum columnae huic appropinquatur, eo texius cellulosus laxior evadit. Itinere nostro partes sequentes nobis sunt obviae: 1. Colen descendens, quod a pariete abdominis posteriore una cum sacco peritonaei leviter attollendum est. 2. Musculus Iliacus internus fasciâ iliacâ tectus, super quam 3. Ureter et vasa spermatica, fasciâ sic dicta propriâ implicata, prorepunt. 4. Musculus denique Psoas magnus. Sacco igitur peritonaei hac ratione

a parietibus abdominis sejuncto et ad latus una cum intestinis remoto, Aorta, Vena cava inferior aliaque organa, supra jamjam enumerata, sub oculos cadunt.

Textus, qui ad Aortam Abdominalem attingendam dissecantur, sunt sequentes:

I. In prima methodo (cum incisione peritonaei):

1. Integumenta communia. 2. Fascia superficialis. 3. Linea tendinea alba. 4. Membrana abdominis serosa.

II. In secunda methodo (sine incisione peritonaei). Si in cadavere incisiones parietum abdominalium tali ratione institueris, ut altera earum directionem lineae verticalis aut obliquae a costâ septimâ aut a processu xyphoideo sterni ad spinam anteriorem superiorem ossis ilei ductae sequatur, altera vero juxta lineam horizontalem fiat, ligamento Poupartii parallelam et pollicum anglicanorum duorum spatio ab eodem distantem; haec, quae sequuntur, strata cultro occurrent.

In priore sectione: 1. Integumenta communia. 2. Fascia superficialis, duobus laminis constans. 3. Fibrae musculares Obliqui abdominis externi a superioribus et exterioribus inferiora interioraque versus decurrentes. 4. Textus cellulosi lamella et fibrae musculi Obliqui abdominis interni a superioribus et interioribus inferiora exterioraque versus procedentes. 5. Denuo stratum cellulosum fibraeque transversae musculi abdominis Transversi, ac nonnulli surculi arteriales non mediocres (ex Circumflexa Ilei) 6. Fascia transversa, quae modo

lamellae cellulosae, modo verae membranae fibrosae speciem prae se fert. Ne fasciam hanc pro peritonaeo ipso habeas, et a partibus adjacentibus separare incipias; tenaciter enim internae musculi Transversi faciei adnectitur. 7. Membrana abdominis serosa ipsa, quae cellulosae ope cum fascia transversa laxe cohaeret et ab ipsa facilis negotio hic digitis integra scinditur.

In posteriore sectione: 1. Integumenta communia. 2. Fascia superficialis. 3. Aponeurosis musculi Obliqui abdominis externi. In angulo autem incisionis externo jam musculares fibrae musculi hujusce. apparent. 4. Musculus Obliquus abdominis internus, qui fere horizontalis, et aliquantulum inferiora interioraque versus tendentem directionem habet. In angulo vulneris interno autem linea semicircularis tendinea in conspectum venit. 5. Musculus abdominis Transversus in hac regione fibris tendineis contextus, qui maximam vulneris partem occupant; in interno incisionis margine tantum fibrae muscularares ejusdem musculi conspicuntur. 6. Fascia transversa cum tendineis istis fibris tenacissime coalita. Fascia haec, interdum tenuissima, ab iis omnius sejungi nequit. 7. Peritonaeum, tectum adipis strato, perinde ac in primâ sectione a vicinis partibus separatur facilime.

Utraque parietum abdominalium incisio, ratione habitâ spati, quo ab Aortâ abdominali distat, ac facilitatis, quâ peritonaeum a vicinis partibus sejungitur, eadem commoda refert eademque incommoda.

Utra autem methodus Aortam abdominalem denudandi, cum incisione peritonaei vel sine eadem exsecutu facilior est?

Primâ in methodo: Etsi partem solum tendinosam (lineam scil. albam) incidimus et facilis citiusque ad saccum peritonaei pervenimus 2) neque, nisi rarissime, arteriolam ullam laedimus 3) et forsan citius etiam Aortam abdominalem ipsum assequimur; attamen eodem tempore: 1) Membranam abdominis serosam vulneramus, quare omento et intestinis ad prolapsum, sicut maximum operationis obstaculum, ansam porrigitus, imo quid? peritonitidem lethalem provocamus et sanguini ac puri in cavum abdominis viam aperimus. 2) Utroque ex laterre arteriae denuo peritonaeum acu aneurysmaticâ perforantes facilime venam Cavam, ductum thoracicum, ipsam Aortam et praesertim Arteriam Mesaraicam inferiorem laedere aut filo prehendere possumus. 3) Omentum aut intestini ansam in vincturam prehendere pericitamur. 4) Ligaturâ denique cum intestinis in contactu relictâ, irritationem et suppurationem viscerum molestam excitandi, in periculo versamur.

Nunc secundâ in methodo multa licet muscularia strata multosque arteriae Epigastricae et Circumflexae ramusclos dissecemus ac peritonaeum a partibus vicinis spatio non exiguo discindamus, suppurationi igitur profusae copiam faciamus; attamen: 1) Chirurgus cautione adhibitâ peritonaeum intactum relinquit, ergo omnes, quae laesionem ipsius sequuntur, molestias evitat. 2) Vagina fibrocellulosa Aortae

abdominalis aptius perforanda separandaque est, quam peritonaeum, arteriam istam obtengens; hanc ob causam laesio Venae Cavae, ductus thoracici ac arteriae Mesentericae inferioris facilius, quam primâ in methodo declinatur.

Sed aliae forsitan, praeter situm, rationes existant, quae primam methodum alteri praeferrendam esse cogunt; hoc infra videbimus.

Utrum Aortae supra arteriam Mesaraicam inferiorem, an infra hanc sit vincitura injicienda?

Ex rationibus anatomicis in pagina 10 enumeratis, patet: 1) Portiunculam Aortae abdominalis positam supra arteriam Mesentericam inferiorem magis a Naturâ ipsâ ligatura applicandae accomodata dat esse. Revera, si duodenum obvium non esset, vincitura Aortae abdominalis hoc loco, omnino periculo vacaret. Etenim et Vena Cava inferior et ductus thoracicus et Sympathicus nervus spatio multo majore hic ab Aortâ distant, quam in portione ipsius, infra Mesentericam inferiorem sitâ. Contra: 2) Posteriorem hanc portionem Aortae, praeter partium dictarum proximitatem, ipsius arteriae Mesentericae inferioris truncus insignis legit eique lamellae fibrocellulosae ope adnectitur.

Ex hisce omnibus, quae *de situ* Aortae abdominalis ad partes vicinas dicta sunt, haec colligimus:

- 1) In universum Aortae abdominalis vincitram, etiamsi perfici posse negari nequeat, tamen sequentibus gravissimis stipari incommodis: partium tractandarum situ

profundo et a visu remoto; organorum nobilissimorum, ut ductus thoracici, Sympathici nervi, venae Cavae inferioris, arteriae Mesentericae, Duodenî proximitate.

- 2) Duplici modo ad Aortam abdominalem perveniri posse: cum incisione peritonei vel sine eâdem; posteriorem modum tuiorem et ligatura applicandae aptiorem esse.
- 3) Ligaturam Aortae abdominalis inter utramque Mesentericam arteriam, ei, quae infra Mesaraicam inferiorem injicitur, praferendam esse.

Nota. Animadvertendae insuper sunt hae, quae sequuntur, tres regulæ:

- 1) Acus aneurysmatica, ne Cava inferior laedatur ab interioribus, a latere scilicet Venae ipsius, exteriora versus subducatur. 2) Ut vinculi ex orificio acus extractio (quod difficultimum est nostrae operationis momentum) facilior reddatur, in una ligatura extremitate nodulus formetur aut corpusculum quolibet durum (e. g. frustulum ligneum) ei adnectatur, necesse est. Saltem in ligaturis Aortae, a me in animalibus vivis multoties institutis, encheires in hanc semper cum fructu adhibui. 3) Ne autem acum aneurysmaticam subducendo arteriam ipsam incuite laedamus, cl. Lisfranc docet digitum indicem non eo loco, ex quo apex acus arteriam subductae egreditur, apponendum, sed nonnullis lineis supra vel infra hunc locum arteriae applicandum

esse. Optimum hoc consilium olim, quum in vitulo vivo Aortam ligarem, non secutus, arteriam hanc apice acus perforavi, animalque haemorrhagiæ est enecatum.

III.

Status morbosus, contra quem Vinctura Aortæ abdominalis instituitur, est tum *traumaticum*, tum *spontaneum arteriae Iliacæ aneurysma*. Inter angustos dissertationis limites orationem meam cohibere coactus, sequentia duntaxat de morbo hoc in praesens considerabo.

Experiendi comprobatum est:

1) Aneurysma istud, tam supra quam infra arcum cruralem extensem, semper peritonaeo aliisque vicinis partibus tenacissime coalescere.
2) Arterias Epigastricam et Circumflexam ilei, adinstar omnium arteriarum, quae e cavo sacci aneurysmatici egrediuntur, coagulo sanguineo infarctas esse.

3) Caeterum aneurysma arteriae Iliacæ, quo ad signa et decursum, cum caeteris aneurysmatibus esse congruentissimum.

4) Omnia, quibus Natura ad aneurysmata tollenda utitur subsidiis, *modo successivo, gradato, non vero subito* progreedi.

5) Vincturam truncis arterialibus, qui per directas ramorum majorum inosculationes anastomosin ineunt, applicatam aneurysmata horum truncorum tollere.

Ex his igitur patet:

1. Vincturam Aortæ abdominalis, si in la-

tere aneurysmate obsesso instituatur, vel omnino sine laesione peritonaei fieri nequire, vel, ut laesio haec evitetur, in latere opposito (scilicet per secundam incisionem, vid. p. 13. II.) facienda esse.

2. Tanquam aneurysmata arter. Iliacæ ab aliis nihilo differunt, *indicaciones et contraindicaciones* ad operationem *easdem* ac in aliis esse. Sane difficultum est in praxi Chirurgicâ aptum operandi tempus definire. Sic in aneurysmatis operatione, si ligatura arteriae praecox instituitur, vasis collateralibus non dum dilatatis, nutritionem in membro tollere; si vero tardius suscipiatur, idoneo spatio carere, pericitamur.

3. Sanguinem, trunco Aortæ devincto, per arteriarum Epigastricæ et Circumflexæ anastomoses, ad saccum aneurysmaticum non affluere, securitatem ergo methodi Brasdorianæ in aneurysmatibus inguinalibus denegari omnino non posse.

4. Summum in aneurysmatibus curandis propositum id sequendum esset, ut Naturam *in gradatâ arteriae obliteratione et sanguinis adfluxus successivâ moderatione* imitemur.

5. Nos analogiæ eductos ad aneurysmata inguinalia tollenda, metu redditus morbi deposito, Aortam inter utramque arteriam Mesentericam devincire posse.

IV.

Nunc *de modo, quo vinculum Aortæ abdominali applicatum, vim suam exserit.*

Hic explicabimus: 1. Quid ligatura in arteria ipsa efficiat ac quomodo afficiat arteriam circumdantes partes. 2. Quas mutationes rami Aortae anastomotici et laterales, et 3. Denique quas organismus totus, ineant.

I. Quomodo ligatura in parietes Aortae ipsius et in partes vicinas agit?

Viam jam tritam ingredimur. Leviter igitur tangam modo sequentia, quae observationibus sunt stabilita:

1) Vinculum duplicum in parietes arteriales vim exercere posse: comprimentem nimirum et rescentem. Modo scilicet parietes ipsius comprimit ac in mutuum contactum adducit, modo tunicam medium intimamque dividit.

2) Varium hunc vinculi agendi modum a variis ipsius proprietatibus et constrictionis gradu multum pendere. Sic v. c. ligaturam 2 linearum latam planamque parietes arteriae modo comprimere, $\frac{1}{2}$ et $1\frac{1}{2}$ linearum latam intimam medianamque tunicam rescindere, observationibus constat.

3) Et hac et illa vinculi actione ad obliterandam arteriam perveniri posse. Etenim, ut arteria impervia reddatur, parietum ipsius mutuum solum contactum sufficere, demonstrant: membranarum serum secernentium, ad quarum seriem et intima arteriarum tunica pertinet, ad inflammationem proclivitas; exempla arteriae sola tumoris aneurysmatici pressione, obliteratae; experimenta, quibus constat, arteriam Radialem in equis, solo torculari applicato, IV elapsis diebus, jam plane obliteratam fuisse; cura aneurysmatum, methodo cel. Guattani adhibita;

ductus Galeni, arteriae umbilicalis ac aliorum corporis nostri canalium, cum vacui relictii sunt, effici solita obliteratio; Mislei denique pericula.

4) Quo vinculum tenuius, quo fortius constrictum, eo aptius coagulo lymphatico externo locum circumambiri ligatum, eoque tutius arteriam devinctam obliterari.

5) Vinculum denique nullo alio modo, nisi continuat arteriae solutâ, vulnere expelli, ita ut, cellulosa tunica suppurationis ope destructa, ipsum intactum ac non solutum cum pure evacuetur. Inter utramque vero extremitatem arteriae solutae jam coalitam coaguloque sanguineo obturatam, lympha exsudata magis magisque indurescit, coagulum lymphaticum exterrit attenuatum, diminutum in substantiam fibrocellulosam mutatur. Ea denique trunci arterialis pars, quae supra infraque ligaturam invenitur, cum nullum jam sanguinem accipit, lege omnium corporis humani ductuum collabitur, angustatur et in ligamentum impervium transformatur.

6) Tempus, quo ligatura decidit, determinari nequit, et delapsus plus minus celer ligaturae tum a formâ ipsius, tum a methodo applicandi, tum a corporis constitutione multum pendet. In universum ligatura inter VI tum et XXimum diem post applicationem solet delabi.

7) Vinculum rescindens arteriae applicatum et 48 et 72 horas post applicationem sublatum, in universum arteriam reddit imperviam.

8) Si vero parietes arteriae vinculo tantummodo comprimuntur, obliteratio dierum trium spatio elapsa perfecta observatur.

9) Tunica cellulosa arteriae, spatio hora-

rum 110 post vinculi applicationem transacto, adhuc intacta remanet, lymphà plasticà modo obtecta. Tunicam hanc etiam intactam remanere, vinculo 24 — 110 horis elapsis sublato, experimentis Walteri constat.

10) Aortam vel non plane sanam nec latà nec tenui ligaturà dirimi; ligaturà latà et crassà vero tunicas internas arteriae dividi, et interdum tenuius, interdum vero crassius tunicae cellulosae stratum integrum intactumque reliqui, filum autem bombyceum tenue nunquam, sicuti et filum cerà obductum, tunicam hanc dirimire, experientià Lawrencii probatur. Quod si relationem magnitudinis arteriae ad vim ligaturae observemus, regulae communi plane contraria accipiemus, majoris videlicet voluminis vas tenuissimam, minoris autem multo latiorem ligaturam postulare.

11) Ligatura methodo Lawrenciana applicata non semper vasorum absorbentium vi auferri potest, et vinculum, etsi ex materià animali confectionum, corpori tamen quum immittitur, aequa ac omnis ligatura alia, alienam quandam in organismo vim exserit eumque variis afficit injuriis.

12) Observationibus et experimentis etiamsi demonstratum est, proximitatem rami collateralis, quo minus in devinctà arterià coagulum sanguineum formetur, impedire, adhaesivam vero inflammationem non destruere, nihilominus tamen multa exempla nobis probant, saepe a ligaturà proprie originem rami collateralis applicatà, haemorrhagiam provenisse.

Ex omnibus hic adductis quoad operationem nostram evincimus:

1. Cum imitatio Naturae est summum in praxi chirurgicà propositum, patet ex 1) — 9) finem exoptatum è tantum ligaturà plane attingi posse, quae parietes Aortae modo comprimens et in mutuum adducens contactum ipsam oblitteret ac, continuitate arteriae non solutà, vulnere expellatur.
2. Ad Aortam devinciendam vinculo tenuiori utendum esse ac corporum peregrinorum, quam minimam copiam in vulnus introducendam esse. Instrumenta igitur, ad arteriam constringendam excogitata, in Aortae abdominalis vincturà prorsus refutentur.
3. Methodum Lawrencianam in operatione nostrà remedium ambiguum esse.
4. Vinculum nunquam directe sub Mesentericæ inferioris origine applicandum esse.

II. Truncus Aortae Abdominalis constricto quales mutationes in systemate arterioso oriundas observari liceat?

Aortà abdominali ligatà aut obliteratà organismi duplice modo sanguis suppeditatur:

1. Per mutuas minutissimorum surculorum, quorum ope arteriae pars supra ligaturam jacens cum inferiore parte jungitur, anastomoses.
2. Per directam arterialium truncorum communicationem.

Ad priores referuntur: 1) *Anastomoses Mammariarum internarum cum Epigastricis*, quae sanguinem ligatà Aortà, ad extre-

mitates inferiores vehunt. 2) *Anastomoses arteriarum Lumbalium mutuae et cum Intercostalibus, Sacra laterali (ex Hypogastricā), Ileolumbalibus et Epigastricis*, quae medullam spinalem et musculos pelvis sanguine subornant. 3) *Anastomoses arteriarum Haemorrhoidalium internarum ex Mesentericā inferiore cum Haemorrhoidalī mediū ex arteriā Pudendā et Sacro-lateralibus (ex Hypogastricā) nec non cum arteriā Sacramedid.*

Ad Secundum ordinem pertinent:

Arcus anastomotici arteriarum Mesentericarum, superioris scilicet cum inferiore, qui laticem ad intestina vehunt.

De circulatione collaterali, observationibus haec, quae sequuntur, sunt demonstrata;

1) Ramos anastomoticos, quorum ope circulatio collateralis peragatur, in variis individuis varios esse. Insignem etiam vim diversae conditiones secundariae hic exercent. Ita v. c. pressio, quam arteria ex aneurysmatico sacco patitur, membrique situs ipse dilatationem hujusce vel alias vasculi tum impedit, tum adjuvare possunt. Prospera circulationis lateralis restauratio etiam ex aetate aegrotantis, nec non ex situ arteriae ligatae cordi propiore aut remotoire dependent.

2) Circulationem collateralem non organis modo nutriendis, sed eorum etiam functionibus et secretionibus sustentandis favere.

3) Tunicas arteriarum, uti et alias corporis nostri membranas, peculiari proprietate gaudere, quā simul ac cavitas arteriae dilatetur,

non extenuantur ipsae, imo adhuc crassiores redundunt; idque multum sane valet, ne arteria sanguinis adfluxu ancto dilaceretur, quod saepissime in anatomicis injectionibus accidit.

4) Transitus sanguinis in collaterali circulatione per anastomoses et vascula minutissima peculiari phaenomeno, caloris scilicet animalis adauctio, stipari: nempe post truncum ligatum temperatura membra, confessim descendit; sed aliquot horis elapsis 2—3—4—6 gradus adscendit, deinde sensim sensimque denuo descendit, denique temperaturam reliquorum organorum prorsus adaequat. Phaenomenon hoc explicatur croris in capillaria vasa uberiore affluxu, quam qui in statu naturali adesse solet. Sane copiā sanguinis adaeucta, attractio etiam ipsius versus textum organorum fortior evadit; multum hic et via nerva consert, quod probat frigus membra, nervo dissecito, multaque alia, praesertim a cel. Brodie instituta pericula. Attamen non semper temperaturam eodem modo auctam post ligaturam observare licet. Accidit enim interdum, ut tumor aneurysmaticus, qui truncum arteriale deprimit, jam ante ligaturam in vasis circulationem collateralem excitet, itaque crnor in viam jam apertam incendens non amplius tantā cum rapiditate ad vasa minora vehatur, et hanc ob causam non manifestum caloris augmentum producat.

5) Praeter vasorum collateralium dilatationem nova adhuc vasa post ligatum truncum formari experimentis Parry, Ebelii aliisque constat. „Vasa haec semper fere torta non solum

ex trunci vinci parte inferiore, sed et ramis quoque inde dibescentibus progerminare et plurimis osculis inter se jungi solent. Parti trunci ligati superiori vel ipsi, vel ramis inde orientibus immittuntur (Ebel)."

Aortà abdominali vero vinculo constrictà, sanguinem versus partes infra ligaturam sitas vehi, probatur:

1. *Anatomicis injectionibus.* Etenim in cadavere, trunco Aortae sub origine arteriae Coeliacae aut inter utramque Mesentericam aut sub arcu, ligato, si coloratus liquor arte in arteriam hanc pellitur, in remotiores eum anastomoses (in arterias Tibiales v. c.) transire, animadvertis.

2. *Experimentis in animalibus vivis institutis.* Quae nosmet ipsi instituimus commemorare liceat.

Experim. 1. In vitulo utramque arteriam Cruralem denudavi. Dein sectione a latere columnae vertebralis factà, Aortam abdominalem reperi. Illoco supra bifurcationem ipsius filum subduxvi, eamque modo successivo constrinxi, donec pulsatio in arteriis Cruralibus cessavit. Una harum sectà, nullam haemorrhagiam animadvertis. Ligaturam solvi. Haemorrhagia statim apparuit. Aortam jam subito constrinxi ac Cruralem arteriam alteram incidi; mox sanguis ex superiore ejus parte prosiluit, paruum describens arcum. Idem in alterà Crurali inveni. Hanc adhuc superius vulneravi. Haemorrhagia continuatur et fortior evadit. Hoc multoties in arteriâ Crurali et Iliacâ hujuscemodi animalis repetii. Idem inveni.

. *Experim.* 2. In cane sub Aortam abdominalem, modo supra exposito denudatam, vinculum subduxvi. Omnem fere muscularum in crure sinistro molem usque ad os secui. Cruor ex arteriâ Crurali magnâ cum vehementiâ proruit; sed arteriâ contractâ impetus sanguinis mox diminutus est. Aortam subito vinxii. Haemorrhagia cohita est; ut vero res mihi melius persuasa esset, musculos alterius cruris èadem ratione dissecui, haemorrhagiâ nullâ comparente. Sed vix sexagesima minutae unius parte elapsâ, sanguis ex superiore arteriae Cruralis dissectae parte stillare coepit et affluxu ejus rapidissime aucto, undam tandem non exiguum ruere animadverti, haud tamen restitutâ pristinâ rapiditate et vehementiâ. Confer, adhuc experim. 14.

Etiam pericula, quae A. Cooper in canibus minoris magnitudinis instituit, demonstrant, circulationem collateralem, Aortâ. Abdominali inter utramque Mesentericam devinctâ, Lumbarium ope ramorum continuari.

3. Denique *cadaverum sectionibus*, sed de hoc infra fusius.

Quibus ex omnibus ratiocinari possumus haec:

- 1) Aortam abdominalem respectu operacionis ligature habito, de numero aliorum truncorum arterialium excerptam esse. Quippe enim notum est, in omnibus his truncis, quo longius vinculum a corde distet, eo magis ramis collateralibus parcit eoque majori, faustum operationis eventum, spe niti. In portione autem Aor-

tae Iliacomesaraicà, si ligatura cordi proprius injiciatur, insignem anastomosin intactam linqui, Mesentericam nimirum inferiorem, quae largissimis inosculationibus cum Mesentericà superiore juncta, sanguinem ex parte Aortae supra ligatram sita, in portionem ipsius infra positam vehat.

- 2) Post truncum Aortae abdominalis ligatum collateralem circulationem triplicis generis esse: alteram, quae per minutissimos ramos anastomoticos, alteram, quae per immediatam arteriarum Mesaraicarum inosculationem, postremam denique, quae per vasa nova fiat.
- 3) Caloris animalis extremitatum inferiorum, trunco Aortae ligato, redditum haud dubium esse restauratae circulationis signum. Causam vero hujus phaenomeni non tam in systemate capillari, quam in sanguine ipso sitam esse. Vis nerveae influxus etiam haud quaquam denegandus est.
- 4) Experienciam constat, anastomoses arteriarum tam esse insignes, ut trunco Aortae vel infra Mesentericam inferiorem devincto, sanguis illico ad partes inferiores afferatur, tanta saltet quantitate, quantà ad vitam ipsarum conservandam requiritur.

III. Quas mutationes reliqua organa, post vinculum, Aortae abdominali applicatum, ineant?

Mutationes organorum, quas e functione Aortae abdominalis derivavimus et post devinc-

tionem ejus oriundas *a priori* stabiliyimus (vid. p. 7. 2), jam sunt expositae. Num vero observationes theoriam istam comprobant? Num pericula in animalibus vivis instituta idem demonstrant? Videbimus:

Experim. 3. Aortam abdominalem canis, magnitudine mediocri praediti, ligavi, facta a latere columnae vertebralis sinistro incisione. Peritonaeum laesi. Intestina per vulnus protrusa denuo in cavitatem abdominalem reposui; vulnus suturā cruentā conserui. Statim post operationem peractam animal surrexit, sed deinde latere dextro humili prostratum gannire coepit. Respiratio erat difficultilis, celerrima. Extremitates inferiores, dum superioribus incedebat, pone se traxit et ad mortem usque, (quae 12 horarum spatio elapso accidit), gannivit. Cibum non assumpsit. Cadavere dissecto inveni: 1) Vinculum spatio I pollicis infra arterias Renales interposito et ad $1\frac{1}{2}$ fere pollices supra bifurcationem Aortae applicatum. 2) Utramque Mesentericam supra locum ligatum sitam. 3) Venas Cavae tam superiorem, quam inferiorem, venamque Pulmonalem ac alias vel cutaneas venulas, sanguine repletas. 4) Pulmones coloris rubicunduli, contractos. 5) Cor dextrum sanguine fluido nigro valde repletum. 6) Cor sinistrum et Aortae originem coagulo sanguineo infarcta. 7) In peritonaeo et intestinis nulla perspicua inflammationis signa, nisi ansam intestini, in vulnere sitam, exceperis. In cerebro et medullà spinali nihil adnotationis dignum.

Experim. 4. In cane melino majoris staturae, annorum quatuor, Aortam abdominal-

lem peritonaeo intacto, devinxì. Respiratio erat celeris et difficilis, musculi abdominales fortiter agebant. Venaesectio ex Venâ Jugulari instituta est ad uncias octo forsitan. In universum animal XXII fere sanguinis perdidit. Vulnerus conservui. Operatione instituta animal humi jacebat et ululabat; venaesectio ex alterâ Venâ Jugulari ad XII . Situs extremitatum inferiorum earumque sensibilitas diminuta paralysin demonstrant. Respiratio adhuc anhelosa et stertorosa. Cor vehementer pulsat. Horis 2 transactis, animal melius se habet. Alterà die post operationem: extremitates inferiores et rostrum paulisper frigidum; animal silet. Vespero ululabat et vas ligneum dentibus corrosit. Nocte vero, ergo triginta sex post operationem horis transactis, extinctum est. Usque ad mortem humo non surgebat. Sectione cadaveris factâ, animadvertisi: 1) Maxillas spasmodice quasi contractas linguamque exsertam. 2) Venulas cutaneas sanguine injectas. *In cavo pectoris:* 3) Pulmones columnam versus vertebralem compressos; lobum inferiorem sinistrum coloris lividi; lobum inferiorem dextrum coloris fusci, flavidornubicundi; lobos superiores coloris rubicunduli. Caeterum sanguine vacuos, molles, sub cultro parum crepitantes. 4) Liquorem sanguinolentum in cavum pleurae et pericardii exsudatum. 5) Diaphragma in cavum pectoris prominens, apicem excavationis ipsius costam 6 aequantem. 6) Venam Cavam superiorem, atrium dextrum, auriculam dextram, fluido nigroque sanguine impleta ac sanguineis et plasticis coagulis infarcta. Internam superficiem Venae Cavae superioris co-

loris fuscâ. Ventriculum cordis dextrum etiam nigris sanguincis coagulis plenum. 7) Ventriculum sinistrum sanguine vacuum. In atrio verso sinistro Venâque Pulmonali magnum coagulum albendum. 8) Venam Cavam inferiorem atque Iliacos ejus ramos nigro, duriusculo obturamento sanguineo clausos. *In cavo abdominis:* 1) Intestina et peritonaeum perspicuo ullo inflammationis signo immunita. 2) Intestinum Rectum faecibus durissimis, vesicam urinariam urinâ expansam. 3) Vulnerus exterritum non coalitum. 4) Aortam trium fere pollicum anglicanorum spatio supra bifurcationem interposito, devinctam, omnes vero insignes ejus ramos supra ligaturam positos, intimam et medium tunicam Aortae disruptam; inter margines tunicarum lymphae plasticae exsudationem. Coagula sanguinea per tractum Aortae dissita.

Experim. 5. In vitulo macro alacrique Aortam abdominalem ligavi; peritonaeum laesi; intestina nonnulla tenuia, quae extra vulnera protrudebantur, reposui. Vulnera suturâ conservui. Mox post operationem animal humi jacebat; spatio tamen temporis nonnullo transacto surrexit, sed in extremitates inferiores recidit easque pone se trahebat; calor harum extremitatum fere idem ac superiorum remansit. Vespero symptomata eadem; semel faeces emisit; cibum non assumpsit. Die alterâ mane animal ululabat; sed dein vultu tristi humi prostratum quasi in stupore jacebat. Pulsationes cordis vix erant sensiles, quasi undosae; respiratio difficilis praesertim muscularum abdominalium vi peragebatur. Rostrum et cayitas oris frigida. Ca-

rotides non pulsabant. Vespere hujusce diei (XIX post operationem horis elapsis) extinctum est. Mors maximam stipabatur anxietate. Cadaver rigidum. Sectione instituta adnotavi: 1) Vascula textus subcutanei venosa sanguine injecta. *In cavo pectoris:* 2) Liquorem exsudatum sanguinolentum. 3) Diaphragma aliquid sursum elevatum. 4) Pulmones rubicundulos, sparsim coloris flavidi; sanguine fere vacuos. Pulmonem dextrum magis quam sinistrum compressum. 5) Pericardium siccum. Atrium dextrum et Venam Cavam superiorem coagulo sanguineo hepatici coloris infarcta. Idem in ventriculo cordis dextra. Coagula haec internae cordis superficie intime adhaerebant. 6) Arteriam Pulmonalem sanguine nigro fluido plenam. 7) Atrium sinistrum Venamque Pulmonalem coagulo sanguineo repletam. *In cavo abdominis:* 1) Ueberimam liquoris exsudati copiam. 2) Intestinum vulnere coalita. Perspicua inflammationis signa nulla. 3) Aortam abdominalem ad 1 pollicem angl. supra bifurcationem ligatam; infra ligaturam nullum ramum insignem. Internam Aortae superficiem ad digitum transversum supra infraque vinculum rubro colore tinctam. Duo coagula basi sua huic arteriae superficie adhaerentia. Intimam medianaque tunicam ruptas; inter margines earum lympham plasticam exsudatam.

Experim. 6. In vitulo septem octovenerum Aortam abdominalem vinculo constrinxii. Peritonacum laesi. Vulnus conserui. Post operationem sequentia animadverti: Paralysiu extremitatum inferiorum, quas animal pone se tra-

hebat, respirationem difficilem, pulsationem cordis vix sensibilem. Aliquo tempore post operationem elapso, lac assumpsit. XII vero horis transactis extinctum est. Ad cadaver inciduntum illico post mortem animalis accessi, inveni: *In cavo pectoris:* 1) Nullam exsudationem; pleuras in statu normali. 2) Diaphragma in cavum pectoris prominens; apice costam 7 aequans. 3) Pulmones coloris rubicundi, nonnihil compressos. Lobos inferiores pulmonis sinistri et dextri coloris flavidofusci, sanguine impletos, sub cultro fere non crepitantes, praesertim partes horum loborum posteriores. 4) Venam Cavam superiorem et atrium dextrum sanguine fluido plena; nullum coaguli vestigium. Idem in ventriculo dextro. 5) Ventriculum sinistrum fere vacuum, in atrio sinistro parvam fluidi sanguinis copiam. 6) Venam Pulmonalem sanguine repletam. *In cavo abdominis:* 1) Intestina cum vulnere coalita; vasa intestinalia nigro cruento injecta. 2) Vesicam urinariam vacuam (animal tempore operationis ueberimam emiserat urinae copiam). 3) Aortam ipsam mox supra arterias Renales ligatam. Utraque Mesenterica ex portione Aortae supra ligaturam sita egrediebatur. Intimam superficiem Aortae aliquot lineas supra infraque vinculum colore fusco tinctam. 4) Cerebrum ad superficiem sanguine injectum.

Experim. 7. In vitulo ejusdem magnitudinis ejusdemque aetatis Aortam abdominalem devinxii. Peritonacum laesi. Exiguam intestini portiunculam nodo praeclusi, hanc ob causam aliam adhuc ligaturam injeci. Sanguine

nem ad $\tilde{Z}yj$ fere misi. Symptomata, quae operatione peractâ, observavi, sunt: Extremitatum inferiorum paralysis, respiratio difficultis et motus nonnulli convulsivi. 19 horis transactis exspiravit. Cadavere (spatio 22 horarum post mortem elapso) lustrato, inventa sunt: *In cavo pectoris*: 1) Diaphragma apice suo costam 7. aequans. 2) Exsudatum in cavo pleurae nullum. 3) Vascula per externam pleurae et pericardii superficiem propullulantia sanguine injecta. 4) Lobi inferiores pulmonis quam sinistri, tam dextri, coloris flavidofusci, compacti; superiores rubicundi, minus compacti. 5) Vena Cava superior et inferior, cor sinistrum et dextrum ac arteria Pulmonalis coagulo sanguineo coloris hepatici et internae cordis superficie cohaerente, infarcta. *In cavo abdominis*: 1) Intestina cum vulnere coalita et latice lacteo plena, ad superficiem externam injecta. 2) Vena Cava inferior et Venae Iliacae sanguine coagulato impletae. 3) Aorta inter bifurcationem et arterias Renales vinculo constricta. Arteriae Iliacae coagulo infarctae. 4) Vesica urinaria urinâ expansa. Vasa cerebri sanguine injecta.

Experim. 8. Aortam abdominalem felis ligavi. Illico post operationem sanguinem ex Venâ Jugulari misi (ad $\tilde{Z}ij$), quo facto animal exsiluit, cucurrit. V post operationem horis elapsis in latere sano humi jacebat, extremitatis anterioribus flexis et ad pectus approximatis, quarum una animal abdomen saepissime teigit, focum, quasi doloris significare volens; re vera quum manum huic regioni applicarem,

voce querebatur acerbâ. *Cordis pulsatio*, perinde ac in aliis experimentis, quasi undosa vix percipiebatur, photophobia, respiratio difficultis. Animal nimiâ anxietate laborans susque deque ad latus jactabatur. *Sensus* et *motus* extremitatum inferiorum perspicue perturbati; harum temperatura aliquid diminuta. Alterâ die: Respiratio difficultis. *Pulsus cordis* celerrimus, fortis. Extremitatum inferiorum paralysis. *Venae sectio* ad uncias II est instituta; sanguis mox coagulabatur; sed illico post hanc operationem respiratio evasit difficultima; animal humi prostratum, ore aperto linguâque exsertâ, spiritum anxie ac celeriter duxit. Cor vehementer palpitabat. Anxietas adacta, pupilla dilatata, oculi splendentes. 40 fere horis post operationem transactis exspiravit. Cadaver rigidum. *Autopsia* 4 post mortem horis elapsis instituta, reperi: *In cavo pectoris*: 1) Pleuram in statu naturali; exsudationem nullam. 2) Pulmones contractos, coloris flavidofusci, sub cultro crepitantes, sanguine fere omnino vacuos. 3) Diaphragma apice suo costam 10 aequans. 4) Venam Cavam superiorrem et inferiorem sanguine fluido repletam. 5) Atrium dextrum sanguine fluido coaguloque impletum. 6) Ventriculum sinistrum fere vacuum. 7) Venam Pulmonalem sanguine fluido repletam. *Cavum abdominis*: 1) Vulnus non coalitum. 2) In peritonaeo et intestinis nulla perspicua inflammationis signa. 3) Intestin. Rectum faecibus, vesicam urinariam urinis extensam. 4) Aortam abdominalem ab origine usque ad vincturam nigro fluidoque cruento plenam. Ligaturam pollicis fere 1 angl. spatio supra arterias Iliacas, applicatam. Arterias Iliacas con-

tractas. Internam superficiem Aortae sparsim coloris badii. Vasa per superficiem externam cerebri et intestinalum propullulantia sanguine injecta.

Experim. 9. In cane duorum mensium Aortam abdominalem vinculo coercui. Peritoneum laesi. Per incisionem ren sinister protrudebatur; hoc reposito vulnus conserui. Mox post operationem symptomata: 1. Extremitatum inferiorum paralysis; has etenim extremitates, dum superioribus incederet, pone se trahebat. 2. Iugentem ululatum edebat, humi in latere sano prostrata. 3. Respiratio difficultis, praesertim vi muscularum abdominalium perficiebatur. Pulsus cordis acceleratus. Die secundâ post operationem: a contactu ululat; extremitates posteriores calidae, sed motu prorsus destitutae. Lac assumpsit. Dic tertiâ symptomata eadem; sed debilissima jam silet. Horis fere 45 post operationem elapsis extincta est. Cadaver rigidum. Sectione (18 fere horis post mortem transitus) instituta, reperi: *In cavo pectoris:* 1) Pulmones nonnulli compressos, coloris rubicundi; incisione ipsorum factâ sanguinis copia exigua effluxit. 2) Diaphragma apice costam 6tam aequans. 3) Pleuram in statu normali. 4) Venas Jugulares, utramque Cavam aliasque sanguine turgentibus. 5) Atrium dextrum sanguine fluido, nigro coaguloque non dissimili impletum. In venâ Cavâ superiore coagulum durusculum, albidum. 6) Parietes cordis incrassati videbantur. Maxime tamen errasse, si illud verum esse arbitratus essem; erat enim interna ventriculi dextri superficies coagulo lymphatico, albido, durissimo, jam fere organisato et te-

nacissime ipsi cohaerente, obtecta. 7) Idem fere in atrio et ventriculo sinistro et in arteria Pulmonali observare milii obtigit. 8) Arcum Aortae coagulo nigroslavido infarcium. *In cavo abdominis:* 1) Laticem serosum parvâ copiâ exsudatum. 2) Peritonaeum circa vulnus pelliculiditate carens. 3) Vulnus jam coailitum. 4) Renem sinistrum inflatum et cum ovario ac lieue fere extra cavum peritonaei situm (inter scil. ora peritonaei vulnerati). 5) Vinculum lymphaticum plasticâ obiectum ac pure madidum mox infra arterias Renales et $\frac{1}{2}$ poll. angl. spatio supra bifurcationem Aortae applicatum. A. mesentericam superiore supra ligaturam; 2 Lumbales, et Mesentericam inferiore forsitan, infra ligaturam sitas. Pars Aortae abdominalis supra locum ligatum jacens nonnulli dilatata et sanguine nigro coagulatoque repleta erat; inferior vero contracta et lymphaticâ plasticâ obiecta. Inter tunicas Aortae sparsim ecchymoses coloris fusci animadvertebantur. In medullâ spinali nil adnotatione dignum reperi, nisi rete vasculosum, rubicundum in superficie posteriore caudam circa equinam, in membranis ipsius exceperis. Vasa in superficie cerebri externâ sanguine etiam injecta.

Experim. 10. Aortam abdominalem canis magnitudinis mediocris, devinxii. Sed ante operationem institutam, sanguinem ex Venâ Jugulari ad $\frac{3}{4}$ Vj misi. Peritonaeum laesi. Intestina et lieu per vulnus protrusa, reposui. Vulnus conserui. Symptomata: 1) Maxima anxietas; animal in omnes partes jactatur et humili prostratum gannit ac insignem ululatum edit,

2) Respiratio celeris, difficilis 3) Cor tam vehe-
menter palpitat, ut pulsus ipsius vix sit sensi-
bilis manuque pectori applicata quasi aquae
ebullientis motus percipiatur. Horā unā post
operationem peractā animal aliquid quiescebat.
4) Perspicua extremitatum inferiorum paralysis.
Horis 40 elapsis: anxietas diminuta, respiratio
attamen stertorosa; pulsus cordis sat regularis;
extremitates inferiores calidae. Spatio horarum
50 praeterlapso animal jam ambulabat, cibum
assumpsit, urinam emisit. Die post operationem
nonā canis lacte assumpto materiem sanguino-
lentam vomuit; pedibus posterioribus claudica-
bat easque spasmodice quasi versus abdomen
comprimebat; urinam maximis cum tenesmis
emittebat, humi jacebat ac voce acerbâ ulula-
bat. Extremitates inferiores frigidae. Nocte ex-
spiravit. Cadaveris sectione, 30 fere horis post
mortem transactis, institutā, animadverti: 1)
Vulnus externum coalitum, ligaturam jam de-
lapsam. 2) Lienem et omentum vulneri coalita.
3) Cavum abdominis sanguine arterioso, extra-
vasato repletum. 4) Extra peritonaeum et circa
locum ligatum multa sanguinea coagula. 5)
Utramque extremitatem Aortae ligatae libere pa-
tentem, a se invicem remotam; inter utramque
extremitatem coagulum sanguineum. Vinculum
infra arterias Renales et infra Mesentericam su-
periorem applicatum erat. 6) Vesicam urinariam
contractam, incrassatam intimamque ejus
superficieum exulceratam ac concrementis calcareis
tectam. 7) Ventriculum latice atrabilari repletum.
8) Totum **systēma venosum**, cor dextrum sini-
strumque et Aortam ipsam sanguine nigro et

coagulato plena. In medullā spinali nihil me-
morandum inveni.

Experim. 11. In catulo felino Aortam
abdominalē, illaeso peritonaeo, ligavi. Opera-
tione finitā, animal illico prosiluit, cucurrit;
sed minutis nonnullis transactis extremitates
posteriores pone se trahebat et querebatur; lac
assumpsit. Alterā post operationem die animal
jam ambulabat; respiratio tamen nonnihil diffi-
cilis erat. Diebus duobus aut tribus elapsis
animal integrum et restitutum. Ad hanc usque
horam vitā fruitur (hebdomadibus scilicet de-
cem post operationem elapsis).

Experim. 12. Aortam abdominalē ca-
nis mensium fere duorum, vinculo constrinxi.
Peritonaeum laesi. Vulnus conserui. Canis post
operationem surrexit; motus tamen extremitatum
inferiorum perturbati erant, ululabat, cibum
non assumpsit. Vespere et die post operationem
alterā ambulabat; cibum sumere coepit. Diebus
tribus quatuorve post operationem transactis vul-
nus externum plane coalitum videbatur; heb-
domade fere unā elapsa inguen sinistrum tume-
bat et die alterā jam tumorem apertum inveni.
Verisimillimum est, vinculum solutum per sup-
purationem istam expulsum suisse. Animal vitā
adhuc fruitur (Hebdomades octo sunt elapsae).

Experim. 13. Aortam abdominalē fe-
lis dupli vinculo constrinxi. Peritonaeum laesi
parumper. Animal mox post operationem sur-
rexit; perspicua extremitatum posteriorum para-
lysis nulla, sed motus parumper debilitati.
Animal vitā adhuc fruitur.

Praeter haec nonnulla, in vitulis praecipue,

pericula institui. Semper fere, symptomata, de quibus locutus sum, adnotavi. Modo in uno, Aortā abdominali ligatā, paralysis extremitatum inferiorum, anxietas etc. tam parum perspicua erant, ut XVI fere dierum spatio elapso perfectā frueretur sanitate. Animali hoc occiso, Aortam loco ligato jam in ligamentum imperium transformatam, vasaque collateralia dilatata reperi. Notatu dignum est, me in hoc vitulo, octo ante vincturam Aortae dies, adhuc utramque Carotidem ligasse. (Conser. adhuc exper. 17—20).

Omnia igitur a me, post Aortae abdominalis vincturam, observata phaenomena rediguntur ad haec fere, quae sequuntur:

- 1) *Sanguinis versus cor congestio insignis.*
- 2) *Hac ex causā organorum respiratio-nis perturbata functio.*
- 3) *Sanguinis in systemate venoso con-gestiones.*
- 4) *Congestio sanguinis ad cerebrum.*
- 5) *Appetitus diminutus.*
- 6) *Extremitatum posteriorum motus et sensibilitas perturbata.*
- 7) *Urinac et faecium emissiones retentae.*
- 8) *Nonnulla irritationis membranarum serosarum pectoris et abdominis signa.*
- 9) *Deinde omnia haec symptomata in ani-malibus, quorum Aorta abdominalis mi-noris luminis est, mitiora esse videntur.*

Ex his omnibus patet: Utrumque corolla-rium, quod de functione Aortae abdominalis dis-screns in medium protuli, (vid. pag. 7) pericu-lis omnino comprobatum esse. Revera etenim arteriā hac devinctā et cordis orgasmum et

organorum chylo ac uropoëticorum nec non medullae spinalis ac extremitatum inferiорum functiones perturbatas animadvertisimus, sed simul vasa collateralia ad omnes horum organorum functiones iterū restituendas, sufficientem crux copiam adferre iisdem periculis evincimus.

Num aliorum experimenta cum meis con-sentiant?

A cel. A. Cooper instituta magis pro-pperum eventum habuisse videntur. Sed teste Hodgsonio, virum hunc celeberrimum pericula sua modo in canibus minoris magnitudinis in-stituisse ac vinculum inter utramque Mesente-ricam Aortae applicasse, nobis notum est. Idem Bierkowsky et Pinel Grandschamps fecerunt. Ma-gnitude autem animalium et praesertim lumen Aortae ipsius in hac operatione magni momenti esse videntur; dein etiam anastomosis tam exi-mia, quam arteria Mesenterica inferior, in Vinc-turā Aortae non parvi esse momenti videtur.

Num observations aliae multo graviore, hominum v. c. ancurysmatis laborantium et extispicia aliiquid pro Vincturā Aortae abdomi-nalis aut contra eam renuncient?

Multae quidem exhibentur *cadaverum autoppsiae*, quae probant et cavitate Aortae ab-dominalis oblitteratā, homines viti perfrui posse. Ill. A. Cooper adducit similes autopsias cadave-rum a Dr. Winslowe, Graham, Paris aliisque in-stitutas. Nuper Dd. Reynaud, Goodisson, Vel-peau Aortam thoracicam et abdominalē obli-teratas, arterias vero Mammarias, Intercostales, Lumbales, Epigastricas, Circumflexas ilei prope modum dilatatas, se vidiisse euarrant.

Casus etiam non desunt Aortae abdominales in homine vivo devinctae. Bina sunt jam evulgata hujus Vincturae, exempla, cuius exitus tamen spei et expectationi haudquaquam responderunt. Alterum casum (anno 1817) protulit famosissimus A. Cooper, alterum (anno 1829) Anglus James. Utraque historia, licet notatu dignissima, tamen ab Auctoribus leviter est descripta. In exemplo a cel. Cooper prolatu, Vincturā Aortae per incisionem peritonaei factā, symptomata sequentia observabantur: 1) Aeger de cephalalgia, de dolore inter scapulas ac lumborum, ardore ventris ac tussi conquerebatur. 2) Vomit. 3) Sensibilitas et temperatura pedis sinistri diminuta. 4) Arteria Radialis per horae saxagesimam 120—144 vicibus pulsabat. 5) Urinae et faecium emissiones difficiles. 6) Cumque omnia haec phaenomena increscerent, in agonem mortis aeger incidit et anxius, manu ad sinistrum praecordium applicatā, vitā decessit, 40 horarum spatio post operationem elapso.

Nota. Memoratu dignum est, phaenomena, quibus Vinctura a Cooper celebrata, stippabatur, admodum cum phaenomenis quae in animalibus a me sunt observata, congruere.

Cavitate abdominis reserata peritonaeum praeter locum circa vulneris margines, qui inflammatione correptus erat, in statu normali invenerunt, Vinculum autem Aortae $\frac{1}{2}$ pollic. supra bifurcationem, ergo infra arteriam Mesentericam inferiorem, applicatum. Sed nec pectoris, neque cranii cava sunt aperta; etiam si auxetas, cephalalgia et sensus in praecor-

dio sinistro ingratus, perspicue sedem affectio-
nis ostendebant.

Altera historia, quam James evulgavit, prorsus incompleta. Id solummodo notum est, Chirurgum hunc in arteriae Iliaceae externae aneurysmate, post quum methodo Wardropii usus, nullum successum obtinuerat, Aortam per anteriorem abdominis parietem ligasse. Aeger post operationem de dolore in membro affecto, cephalalgia et photophobia conquerebatur. Vespere diem supremum obiit.

At nunc quis est, qui non videat nos hu-
jusmodi observationibus nec comprobare aliiquid
posse, neque denegare? Quaerere etenim quis-
que potest, num mors aegrotantium ab opera-
tione, an a morbo diurno et inveterato, an
ab aliā qualicunque causā occultā provenerit? Et ad quaestionem hanc responsum reddere dif-
ficillimum est. Ipsamet operatio etiamsi anci-
piti auxilio, non tamen talis est, quae omnino
perfici nequeat atque in vivis ac perfectā sanitate
fruentibus animalibus a Coopero pertentata fe-
licem faustumque habuit eventum; in casibus
autem hic adductis de aegrotantibus, crudelis-
simō morbo excruciatissimā ac repetitis sanguinis
profluviis exhaustis certe non multum licebat
sperare.

Superaddendum aliiquid restat *de extre-
mitatum inferiorum paralysi*, quae, ut jam
vidimus, operationem nostram semper fere co-
mitatur. Circulatio sanguinis perturbata certe
est causa hujus paralysis primaria; etenim non-
nulla experimenta (1 et 2) a me jam supra com-
memorata, evidenter probant, etiamsi sanguinis

decursum, Aortā abdominali devinctā, in extremitatibus plane impeditus non fuerit, haemorrhagiam tamen, crure amputato, pristinam suam vehementiam ac rapiditatem amisisse. Patet ulterius sententiae nostrae veritas ex aliarum insig-
nium arteriarum, Iliacae externae, verbi causa, et Axillaris Vincturis, quae etiam saepissime tor-
pore membra stipantur. Nihilominus autem san-
guis solus, ut paralyseos causa, nequaquam est
existimandus; quippe cum membrorum torpor
et paralyses, naturali etiam sanguinis cursu ma-
nente, post nervum dissecatum aut compressum
oriri soleant. Primo igitur rerum intuitu jam
duplicum phaenomeni nostri causam cognovimus:
1. Sanguinis scilicet circulationem perturbatam et
2. Nerveam vim labefactatam aut alio quodam
modo alteratam. Revera numerosissimis cel. Legal-
lois aliorumque experimentis constat: *ad ner-
veam vim fovendam, sanguinem necessari-
um esse incitamentum.* Diligens iste Natu-
rae Scrutator se causam paralyseos extremitatum
inferiorum post Aortae abdominalis Vincturam,
in medullā lumbali inquisivisse, asserit ac ex-
perimento confirmare studet. In cuniculo nimi-
rum XV minutis, post ligaturam Aortae abdo-
minalis, elapsis, columnam vertebralem inter
iam lumbalem et ultimam spinalem vertebram
dissecuit et portionem lumbalem medullae stylo
destruxit; quo facto nullas contractiones spasmo-
dicas in musculis extremitatum inferiorum ani-
madvertit. En quae ipsem hunc in finem in-
stitui pericula:

Experim. 4. Aortam abdominalem ex
latere denudatam in fele vinculo coēcui. Ani-

mal illico post operationem surrexit, sed non-
nullis minutis transactis motus extremitatum in-
feriorum observabantur perturbati. Musculos
cruris dextri dissecui: *sanguis ex Arteria Cru-
rali statim prosiluit.* Alterum adhuc vinculum
Aortae applicavi; quod inter utrumque inter-
vallum erat forficē perscidi. Columnam ver-
tebralem persecui: stylo ferreo portionem in-
ferioremedullae spinalis destruxi — contrac-
tiones musculorum cruris vidi. Alterum crus
secui — venosus et arteriosus sanguis proruit
adhuc. Denuo stylum ferreum in substantiam
medullae spinalis (portionis sc. ejus lumbalis)
introduxi — contractiones jam nullas animad-
verti.

Experim. 15. Aortam abdominalem ca-
nis modo supraexposito ligavi; minutis forsitan
8 transactis, alteram ligaturam Aortae injeci, in-
ter utramque ligaturam, arteriam hanc secui.
Dein columnā vertebrale dissectā, inferiore
portionem medullae spinalis destruxi ferreo sty-
lo; — illico contractiones spasmoticae musculo-
rum femoris apparuerunt. Omnes abdominis et
lumborum musculos dissecui: medullam spina-
lem denuo stylo agitando incitavi; — jam nul-
las contractiones animadverti.

Experim. 16. Aortam abdominalem in
vitulo duabus ligaturis, nonnullo a se invicem
spatio distantibus, constrinxī; arteriam inter
utrumque vinculum forficē perscidi. Minutis
forsitan octo transactis columnam vertebralem per-
secui. Portionem lumbalem medullae spinalis;
apice cultri incitavi; illico perspicuas in extre-
mitatibus inferioribus contractiones spasmoticas

observavi. Vitam animalis respiratione artificiali sustinui. Spatio 15 fere minutarum elapo medullam lumbalem iterum stimulo tetigi; — nullas jam contractiones reperi; irritata vero portione superiore — contractiones perspicuas vidi.

Itaque paralyseos, quam ligatà Aortà in extremitibus observamus, sedes partim *in medullà spinali ipsâ*, partim vero *in nervorum finibus* inquirenda esse videtur.

Praemissis de texturâ, functione et situ Aortae abdominalis aliisque notionibus, si omnia quae ex his demonstrare studui, perspexeris, non difficile ea, quae sequuntur, colliges.

I. Nos, à priori judicantes, securitatem vincturae Aortae omnino sub judice adhuc latere vidimus. Etenim:

1. Ratione *functionis* Aortae abdominalis habitâ, vincturam ipsius multis iisque gravissimis incommodis: sanguinis nimirum versus cor congestionibus, nutritione et functione variorum nobilissimorum organorum deletâ, stipatam esse debere, concludimus. Sed numerosissimas vasorum anastomoses inspicientes et legis Naturae de vasorum lumine gnari, aliam sententiam, plane contrariam ferre debemus. (Vid. 3. et 2) et 3). pag. 7.)

2. *Situm* Aortae abdominalis dein investigantes ligaturam ipsius factu omnino facilem reddi posse; mutationibus autem, quas in *statu morbo* init, perspectis, esse difficillimam cognoscimus. (Conf. p. 16 et 18).

II. Vincturam Aortae abdominalis

etiam à posteriori comprobatam et stabilitam non esse perspeximus. Etenim:

1. *Injectionibus anatomicis* tantummodo constat circulationem sanguinis collateralē etiam arteriā hac obliteratā, absolvī.

2. *Experimenta in animalibus vivis et perfectā sanitate fruentibus instituta operationibus*, quae in homine aneurysmate aliisque vitiis laborante, instituuntur, prorsus non esse analoga. Praeterea hujusmodi pericula plerumque in animalibus minore staturā praeditis succedunt et fere semper stipantur extremitatum inferiorum paralysi et cordis orgasmō.

3. *Cadaverum sectiones* etiamsi successum operationis nostrae admodum probabilem reddant, attamen caute Naturam imitemur; nemo enim non videt, Naturam ad obliterandam arteriam sensim sensimque pervenire; modo scilicet gradato cayum ipsius tollendo, sanguinem versus collateralia vasa iter flectere cogit; nos vero vinculo arteriam coērcentes sanguinis decursum perturbamus repente. Extispicia igitur cadaverum perinde ac anatomicae injectiones id tantummodo confirmant, Aortā abdominali obliteratā, sanguinem collateralium ope vasorum ad organa vehi.

4. Quod denique attinet *Vincturam Aortae abdominalis in hominibus* institutam, hac, quoniam morborum historiae causam mortis non revelaverunt, nec probari neque denerari aliquid potest.

Ergo operationis hujus securitas nec *à priori* ratiocinio, 'neque *à posteriori* observationibus et experimentis stabilita esse videtur.

Quid vero impedit, quominus Vinctura Aortae abdominalis prospero sit gavisa successu?

Si symptomata atque alterationes post vincturam Aortae abdominalis in animalibus a me observatas atque sectiones cadaverum a Dr. Winston aliisque institutas (vid. p. 41.) ex aequo disceptaveris, tuum erit judicare utrum reprehendendus sim, nec ne, quod circulationis perturbationem pro causâ mortis proximâ habuerim. Sed non solum Vincturam Aortae abdominalis, verum etiam alias truncorum insignium ligaturas sanguinis circuitu perturbato nec non sanguinis congestiōnibus in varia organa stipatas esse, observatio docet. Observatio nos etiam docet, Naturam in arteriis obliterandis rem plane alio modo aggredi: cavitatem nimirum arteriae pedetentim coarctando circulationem collateralem sensim sensimque restituit ac hac ratione organismum a congestionum et orgasmi injuriis praecavet. Dubitandum igitur non est, gradatae arteriarum compressionis et devinctionis ope, nos omnibus his injuriis omnino occurrere posse. Experientia hoc etiam comprobat. Gl. Assalini et Dubois aliquique jam methodo hac usi sunt. Ut gradata vasorum collateralium dilatatio prosperra evaderet, nec funestum aliquid aneurysmatis operationem sequeretur, alter forcipe, alter ligaturâ et torculari arteriae se instruxit. Methodus haec a Dubois aneurysmati poplitaeo ter adhibita successum his consecuta est felicissimum. Sed nemo de praestantia gradatae obliteracionis arteriarum dubitare potest; impedit vero quominus ad artis incrementum adaptetur

solâ encheiresis, quae cum peregrinorum corporum in vulnere præsentia semper complicatur. (vid. pag. 23. 2).

Nunc argumentis, quae jam supra collegimus, iisque, quae modo prolata sunt, inter se comparatis, sequentia tanquam conclusiones elicienda sunt:

1) Ea solummodo ligature in curandis aneurysmatibus encheiresis, propositum suum plane assequeretur, quae sine variarum machinarum adjumento, parietes arteriae gradatim comprimens, cavitatem ipsius sensim sensimque coarctaret, ac continuitate hujus arteriae non soluta, vulnere expelleretur. (conf. pag. 13. 1. p. 19. 4).

2) Quo truncus arterialis insignior et quo cordi propior, eo magis necessaria ipsius gradata obliterationis, eoque magis periculosa ejus repentina compressio.

3) Gradata truncorum arterialium devinctione duplum scopum attingimus: perturbationem nimirum in systemate sanguifero evitamus, tempusque vasis collateralibus dilatandis praebemus.

Argumentorum, quae adduxi veritate permotus et cupiens, ut vinctura arteriarum gradata sedem in Chirurgia stabilem inveniret, enqua sequuntur, a me instituta sunt pericula, licet repetantur necesse sit.

In cadavere vinculum 7—8 poll. anglicanorum longum et quatuor aut sex octavo filis bombycinis contorum, trunco arteriali subduxii; utramque vinculi extremitatem ad marginem inferiorem compressorii (a Bujalsky excogitati) alligavi; com-

pressorium hoc torsi et cavitatem arteriae prorsus obliteratam inveni. Mutationes, quas filum et arteria ineunt, sequentes sunt: 1. Filum ante contorquetur, brevius redditur, dein in minutissimos nodulos convolvitur. 2. Parietes arteriae ab ansa ligaturee ante arcte circumdantur, dein corrugantur, gradatim comprimuntur, donec cavitas ipsius prorsus obliteratur. 3. Tunicae intima et media arteriae interdum discorduntur, interdum vero manent intactae. 4. Quo vinculum tenuius, eo tutius arteriae obliteratio efficitur. 5. Vinculum cavae arteriae non coarctata nuncquam fere disrumpitur; ad praecavendam vero rupturam humidum fiat necesse est. 6. Quo funiculus crassior, eo facilis distorqueri potest. 7. Vinculum semper fere ad dimidium brevius evadit, ut arteria impervia reddatur. 8. Quo brevius vinculum, eo citius coartatur arteria. 9. Corpus peregrinum inter extremitates vinculi intercedens, obliterationi arteriae obstat.

Haec igitur in cadavere expertus, institui:

Experim. 17. In vitulo debili Aortam abdominalem extra peritonaeum denudavi. Circa hanc acu aneurysmatica duxi funiculum, e filis bombycinis quatuor contortum, et 7 fere poll. angl. longum. Extremitates ipsius compressorio supra memorato alligavi. Nunc ne tela cellulosa inter fili extremitates incideret, digitum inter ipsas superficie anteriori arteriae applicui. Compressorium eo usque torsi, donec parietes Aortae ansa ligaturee circumdatos animadvertebam. *Vulnus conserui.* Animal laqueis coercui. Triduum *torsio vinculi*, compressorii hujus ope, continuabatur, bis nimirum quotidie

ita ut ultimâ vice torquens, vinculum jam dimidio brevius animadverterem, sed pars e vulnera propendens valde sicca disrumpebatur. Tribus diebus elapsis animal solvi. Post nisum et conamina multa demum surrexit. Motus extremitatum posteriorum debiles; animal tamen erectum sese continens, cibum assumpsit. Nulla orgasmi symptomata. Diarrhoea correptum, octo diebus post operationem elapsis, extinctum est. Sectione cadaveris (14 horarum spatio post mortem transacto) instituta, inveni: 1) *Vulnus prorsus coalitum.* 2) Extremitatem vinculi (2 poll. longam) in minutissimos nodulos conglomeratam, in canaliculo, ex lymphâ formato, sitam pureque madidam. 3) Aortam abdominalem spatio 1 pollic. supra bifurcationem, constrictam. 4) A parte hujus arteriae illico supra infraque vinculum sita, arteriae Lumbales procedebant. 5) Eam vinculi partem, quae arteriae applicata est, coagulo lymphatico externo plane obtectam. 6) Cavitatem arteriae in loco ligato prorsus imperviam; segmentum inferius coagulo lymphatico basi sua parietibus adhaerente, impletum; superius vero ob rami collateralis proximitatem, — vacuum. Caeterum aliorum organorum mutationes cum iis, quae in experimendo 7 descriptae sunt, satis congruas. Pulmones nimirum, et praesertim dextrum, coloris fusci, ponderosos, et sanguine nigro nimis impletos. Cor dextrum sinistrumque, Venas Cavas, Aortam thoracicam, vasa intestinalia et cerebri etiam sanguine nigro plena. Vesicam urinariam urinis extensam.

Experim. 18. Aortam abdominalem vituli, extra peritonaeum, denudavi. Arteriae chor-

dam (quintam) subduxi; dein methodo supra jamjam descriptā usus, compressorii ope ita chordam contorsi, ut in parte inferiore arteriae pulsationes etiamsi perspicuas, attamen debilitatas adnotarem. *Vulnus conserui.* Operatione finitā animal sese erectum continens, cucurrit. Laqueis illud coēcui. Biduum gradatam hanc devinctionem continuavi; dein vitulum solvi. Motus extremitatum inferiorum observabantur parumper diminuti. 3—4 diebus elapsis perfectā jam sanitatem fruebatur. Diebus fere 20 transactis, denuo debilitatem posteriorum extremitatum animadverti. Spatio 60 fere dierum post operationem elapso est enecatum.

Sectio cadaveris: 1. *Vulnus externum* jam plane coalitum. 2. A cicatrice vulneris externi usque ad arteriam ligatam funiculus quidam albidus, duriusculus, teres continuabatur; prope ad cicatricem cavitatem exiguum referebat, pure spiso madidam; texturam habebat filamentosam. Nessio num inflammationis productum, an chordae rudimentum fuerit? 3. *Aorta abdom.* in loco ligato ad dimidium fere pristinae diametri coactata, attamen permeabilis. Parietes ipsius incrassati, lymphā coagulabili obtecti; tunicae intactae, intima facile separabatur. 4. Ligatura inter arteriam Renalem et bifurcationem Aortae applicata erat. 5. Nulla ramorum collateralium perspicua dilatatio.

Experim. 19. In vitulo nasi catarrho laborante, Aortae abdominali vinculum 6 firmissimis filis bombycinis contortum, subduxi. Peritonaeum laesi; Aortam tamen extra peritonaeum denudavi. Ligaturam methodo praecedente et adeundem fere gradum compressorii ope con-

torsi. Animal operatione finitā surrexit. Illo laqueis alligato, triduum gradatam hanc devinctionem continuavi. Tempore hoc elapso animal solvi, sed admodum debile, catarro et diarrhoeā correptum, 5 elapsis diebus extinctum est. Sectione cadaveris (biduo elapso) institutā, reperi: Pulmones, dextrum praecipue, coloris lividi. Cor dextrum sinistrumque atque Aortam thoracicam sanguineis coagulis plenam. Ligaturam ad digitum transversum supra bifurcationem Aortae applicatam. Omnes ramos Aortae insignes supra ligaturam sitos. Vinculum extrinsecus lymphā coagulabili tectum facilime distorsi. Tunicae arteriae intactas. Vas loco ligato coarctatum. Supra infraque vinculum coagula duo sanguinea. Obliterationem arteriae non dum finitam. Systema venosum abdominis sanguine impletum. Vesicam urinariam urinis extensam.

Experim. 20. Denudatae in vitulo Aortae abdominali funiculum 4 filis bombycinis contortum subduxi. Compressorii ope eo usque ligaturam torsi, donec arteriam arcte cinctam digito pertentarem. Torsionem continuavi donec pulsatio in parte inferiore arteriae cessaret. Punctum, ubi nunc auricula in axi compressorii inveniebatur, adnotavi. Quo facto vinculum denuo ad eum gradum distorsi, ut parietes arteriales ansā ligaturae arcte cinctos reperirem. *Vulnus conserui.* Animal post operationem institutam surrexit. Eo laqueis coēcito, ligatura per triduum contorquebatur, ne disrumperetur autem, eam aquā humectavi. Tempore hoc elapso animal solvi. Motus extremitatum inferiorum aliquid debilitati observabantur. XX fere diebus post operationem transactis extinctum est.

Cadavere secto animadverti: 1. *Vulnus externum non dum plane coalitum.* 2. *Funiculum ex lymphà plasticà confectum, duriusculum, in medio cavum et pure spisso repletum, qui a vulnere externo ad locum ligatum continuabatur.* In cavo ipsius, prope ad Aortam ligatam, vinculum ab arteriae plane sejunctum et in minutissimos nodulos convolutum jacebat. 3. *Arteriam ipsam vinculo jam solutam; utrumque ipsius marginem (superiorem et inferiorem scilicet) perfecte obliteratum, spatio nonnullarum linearum a se invicem distantem, lymphà plasticà obtectum.* 4. *Nullum coaguli sanguinei vestigium.* 5. *Mammarias internas et Epigastricas aliquid dilatatas.*

Sane multum adhuc superest, ut a nobis excogitata encheiresis (cui nomen *torsionis ligaturae* imposui) propositum suum plene cumulateque assequeretur. Saltem fore ut èa exultâ, ars vires Naturae in arteriis obliterandis, quantum fieri potest, imitetur, magna me spes tenet. Quia:

1) *Vinculum methodo hac applicatum, arteriam, machinis in vulnere non praesentibus, gradatim comprimit.*

2) *Si funiculo crassiore aut chordâ utimur, hanc facilime tribus quatuorve diebus transactis, iterum distorquere et continuitate arteriae non solutâ vulnere eximire possumus.*

Quaeritur nunc, quomodo *constrictionis gradus, ad arteriam obliterandam necessarius, sit statuendus?*

Num funiculus crassior adhibendus, an tenuis, an potius chorda, an denique filum metallicum arteriae applicandum sit?

Quod attinet ad vim et gradum constrictio-

tionis ligaturae definiendum, encheiresis, quâ in periculo 20 usus sum, videtur mihi sat congrua esse. Caeterum experientia omnia haec ulterius demonstrabit.

Omnium, quae a nobis hucusque dicta sunt, summa ad sequentia redigi potest:

I.

Vincturam Aortae abdominalis in aneurysmatibus inguinalibus currandis adhibitu facile et tutum esse remedium, nec ratiocinio, neque experientiâ est comprobatum.

II.

Anastomoses ramique collaterales, trunco Aortae abdominalis obliterato, semper circulationi adjuvandae suppetunt.

III.

Sed praecipuum, quod Vincturam Aortae abdominalis sequitur ineodem, in circuitu sanguinis perturbato consistit.

IV.

**Ad incommodum hoc praecavendum
pedetentim facta arteriae devin-
ctio unicum est remedium.**

V.

**Ad devinctionem arteriae pedetentim
instituendam, torsio vinculi
aliis methodis praferenda est.**

VI.

**Si ligaturee auferendae encheiresis
sine machinarum adjumento fa-
cilius esset, quid, quaequo, causae
est, cur spontaneus vinculi de-
lapsus expectetur?**

VII.

**Locus ligaturee, in Aortam abdomi-
nalem injiciendae, situi partium
maxime accommodatus, portio ip-
sius inter utramque Mesenteri-
cam sita, est.**

VIII.

**Methodus Brasdorianae, ad aneurysma
inguinale tollendum, Aortae ab-
dominalis Vincturae forsitan praef-
erenda est.**

APPENDIX.

Quum opusculum hoc typis excuderetur, ar-
gumenta a me in medium prolata, adhuc
his, quae sequuntur periculis, affirmare studui.
Lector *Benevolus* supradicta pervolvens sine
dubio facile animadvertisit, me in institutis in
animalibus vivis periculis quadruplex habuisse
propositum. Etenim *demonstrare* conatus sum:

1) *Vasa collateralia*, vincturā Aortae ab-
dominalis factā, circulationi adjuvandae sup-
petere posse.

2) Praecipuum incommodum hujusce ope-
rationis in *congestionibus sanguinis* ad or-
gana nobiliora consistere.

3) *Causam proximam paralyseos ex-
tremitatum inferiorum*, quae semper fere
vincturā Aortae abdominalis sequitur.

4) *Pedententim factam arteriae devin-
ctionem esse unicum ad congestiones praeca-
vendas remedium.*

Haec octo *experimenta*, nunc enarranda,
idem quadruplex propositum proseguuntur, exi-
tus tamen nonnullorum a supra expositis aliquid
differunt.

Experim. 21. In agno nonnullorum mensium Aortam abdom. ligavi. Illico post hanc vincturam totam musculorum cruris sinistri molem usque ad os secui; — haemorrhagiam nullam adnotavi, nonnullis sanguinis venosi guttulis exceptis. Totam fere sexagesimam horae unius partem, superiorem arteriae Cruralis dissectae marginem consideravi et nec stillicidium sanguinis arterialis, neque haemorrhagiam veram animadveri; sanguis venosus tantummodo guttatum stillabat. Spatio sexagesimam horae fere duarum elapso, eodem modo crus dextrum secui, — neque magis haemorrhagiam ullam adnotavi, exceptis sanguinis rubri et nigri guttulis nonnullis. Duabus aut tribus sexagesimis horae partibus transactis, etiam nulla haemorrhagia apparuit. Tempore hoc elapso, alio periculo animalculum istud subjeci; alteram nimirum ligaturam Aortae applicui, inter utramque ligaturam arteriam hanc secui; maximam muscularum abdominalium partem et columnam vertebralem in regione lumbali transcidii; inferiorem portionem medullae spinalis specillo incitavi, — contractiones in musculis extremitatum posteriorum nullas animadveri; quinques hoc repetii, nullas contractiones vidi. Eodem stimulo partem superiorem medullae spinalis dissectae tetigi, — illico vehementissimas contractiones spasmodicas in trunco et extremitatibus superioribus adnotavi.

Experim. 22. In ovi duorum fere annorum arteriam Cruralem sinistram denudavi. Aortae abdominali vinculum subducens acu aneurysmatica ramum quendam Aortae sat exi-

mum laesi. Apice cultri arteriam Cruralem denudatam vulneravi, — mox sanguis maximam cum rapiditate prosiluit; Aortam illico ligavi; haemorrhagia nulla praeter sanguinis venosi stillicidium; sed quum horae partibus minimis nonnullis elapsis marginem superiorem arteriae Cruralis dissectae considerarem, sanguis arteriosus ex margine hoc manare coepit, haudquam tamen prasinà cum rapiditate. Crus dextrum amputavi: idem inveni, sanguinem arteriosum et venosum nimirum adsidue, sed guttatis, non vero rivuli adinstar stillasse. — Alterum adhuc vinculum Aortae applicavi; vas hoc inter utramque ligaturam perscidi; — haemorrhagia ex utrâque arteriâ Crurali continuabatur. — Instituto hoc periculo maximam muscularum abdominalium partem nec non columnam vertebralem in regione lumbali persecui; inferiorem portionem medullae spinalis stylo incitavi et destruxi, — spasmodicas in extremitatibus posterioribus et muscularis dorsospinalibus contractiones animadveri. Hoc multoties repetendo idem inveni.

Experim. 23. In ariete, unius fere anni, Aortam abdominalem mox supra bifurcationem in art. Iliacas, vinculo constrinxi. Operatione finita animal ite sivimus; quum tamen hoc facere vellet, in extremitates posteriores cecidit, easque motu et sensu prorsus destitutas pone se traxit. Nemo adstantium perfectam harum extremitatum paralysin non adnotavit. Temperatura articulorum infimorum diminuta observabatur. Factâ cutis incisione animal nullum dolorem manifestavit, nullaque haemor-

rhagia in conspectum prodiit. Horā fere unā elapsā, quum semper in eodem statu maneret, muscularum cruris sinistri molem usque ad os persecui, — adparuit *stillicidium* sanguinis ex art. Crurali, cruor nimirum ex margine humus arteriae dissectae *adsidue guttatum* (non vero *rivuli ad instar*) manavit. Idem in crure dextro institui, simile stillicidium sanguinis venosi et arterialis, tamen cum paulo majori rapiditate, ex Cruralibus vasis dissectis adnotavi. Notatu dignum est, animal tempore amputationis nullum perspicuum doloris signum edidisse; incitavi nervum Cruralem, — nullum quoque dolorem manifestavit. Quo facto Aortae alterum vinculum injeci, maximam muscularum abdominalium partem transscidi, columnam vertebralem in regione lumbali serrā persecui, inferiorem medullae spinalis portionem stylo incitavi et destruxi, — perspicuas muscularum contractiones nullas vidi; idem cum portione superiore medullae spinalis feci, — vehementes contractiones spasmodicas illico conspexi.

Experim. 24. In agno quatuor aut quinque mensium Aortam abdominalem ligavi. Peritonaeum parumper laesi. Vulnus conserui. Operatione peractā animal prosiluit, sed illico in extremitates posteriores decidit easque pone se traxit. Praeter paralysin harum extremitatum respiratio erat difficilis et cum muscularum abdominalium vi adactū naribusque dilatatis peragebatur. — Usque ad mortem, quae 24 horis elapsis accidit, animal humo non surgebat, parum ululabat, cibum non sumebat. Sectione

cadaveris (nycthemero fere uno transacto) institutā, sequentia inveni: *In cavo craniī:* 1) Cerebrum in statu normali; in ventriculis ipsius nullum exsudationis vestigium; vascula per externam ejus superficiem propullantia sanguine non multo injecta. *In cavo pectoris:* 2) In sacco pleurae dextrae liquorē exsudatum serosanguinolentum ad drachmas nonnullas. Superficie pleurae sinistrae internam etiamsi valde humidam, in sacco ipsius tamen exsudationem nullam. 3) Apicem diaaphragmatis costam 6am assequentem. 4) Atrium dextrum, venam Cavam superiorem et inferiorem nec non ventriculum dextrum sanguine coagulato, nigro repleta. 5) Idem in atrio et ventriculo sinistris, nec non in venis Pulmonalibus. 6) Pulmones coloris fusci, lividi, evidenter non naturalis. Sub cultro crepitabant; ex incisionibus ipsorum, factā compressione, sanguis niger paucā quantitate effluebat. Praesertim omnes has proprietates referebant lobi posteriores et inferiores. *N.B.* Pulmonem, quem comparationis causa ex alio agno, per haemorrhagiam enecato, excidi, huic plane dissimilem inveni; etenim levior erat et colorem multo clariorem, rosaceum habebat. *In cavo abdominali:* 7) Exsudatum serosanguinolentum insigni quantitate, ad uncias nonnullas. 8) Vesicam urinariam urinā, intestinum Rectum facibus extensa. 9) Vinculum ad digitos 2 transversos supra bifurcationem in Arter. Iliacas Aortae applicatum. 10) Arteriam hanc ipsam ab origine suā usque ad locum ligatum sanguine coagulato, nigro plenam, nondum coa-

litam; tunicas ipsius medium intimamque sub vinculo ruptas; internam ejus superficiem sparsim coloris fusi (verisimillimum imbibitionis phaenomenon). 11) Vascula per posteriorem ac anteriorem superficiem membranarum medullae lumbalis et praesertim circa origines nervorum lumbalium propullulantia, sanguine injecta ac instar arborum in ramos pulcherrime discedentia, quae a lavatione evanescebant.

Experim. 25 et 26. In duabus ovibus ejusdem fere aetatis ejusdemque magnitudinis, comparationis causa, Aortae abdominali vinculum, varià encheiresi usus, injeci; nimirum in uno horum animalium Aortam abdominalem, peritonaeo illaeso denudatam, repente devinxi; quo facto illud prosiluit, sed mox in pedes posteriores recidit. *Symptomata*, quae 6 post operationem horis elapsis adnotavi, erant: 1) Paralysis extremitatum posteriorum. 2) Respiratio difficillima, celeris. Animal in latere sano, capite extenso, humo prostratum jacebat ac spiritum anxie, nares fortiiter dilatando et vi muscularum abdominalium intensa, ducebat. Aure pectori applicata sonum percepit ei non dissimilem, qui in folli sub flatu animadvertisit. 3) Cordis pulsationem omni tempore numerare non potui — adeo celerrime palpitabat. 4) Calor extremitatum posteriorum aliquid diminutus, saltem anteriorum extremitatum calori non aequalis. 5) Cibum non sumebat. — Sanguinem ex venâ Jugulari ad uncias nonnullas misi, respiratio post venaesectionem difficilior esse videbatur. Alterà die (horis 15 fere elapsis); respiratio melior; animal pedibus sub se

flexis ventreque humi prostratum jacebat. Cor per horae sexagesimam 120 vicibus pulsabat. Cibum sumebat. Spiritum ducebat naribus jam non dilatatis. Temperatura posteriorum extremitatum ac anteriorum non erat diversa. Vespere: respiratio iterum difficillima, stertorosa evasit, cor plus quam 120 vicibus per sexagesimam horae palpitabat. Animal in latere sano humi prostratum jacebat et interdum ululabat. Denuo venaesectio ex alterà venâ Jugulari ad nonnullas uncias; post hanc operationem respiratio iterum difficilior evasit. Horis 48 post operationem animal extinctum est. Sectione cadaveris (14 fere horis post mortem elapsis) instituta, animadverti: *In cavo cranii*: 1) Cerebrum nec nou medullam spinalem in statu normali, saltem nec consistentiam horum organorum alteratam, neque vasa sanguine admodum extensa inveni. *In cavo pectoris*: 2) Exsudationem serosanguinolentam in saccis utriusque pleurae. 3) Apicem diaphragmatis costam fere 6tam assequentem. 4) Pulmonum consistentiam magis compactam, quam quae in statu normali esse solet. Colorem ipsum etiam non naturalem, flavescentem, violaceum; sparsim maculas nigrescentes. Sub cultro crepitabant. Vascula nonnulla Pulmonalia sanguine coagulato, nigro impleta. *Ex* incisa et compressa pulmonum substantia sanguis niger, spumosus effluebat. 5) Cor dextrum sinistrumque perinde ac venas Cavas et Pulmonales coagulo sanguineo hepatici coloris et formam horum vasorum referente, infarcta. Coagulum, quod in ventriculo sinistro inveniebatur, volumine minori

gaudebat. *In cavo abdominis:* 6) Laticem sero sanguinolentum, turbidum, quantitate insigni in cavum peritonaei exsudatum. 7) Vasa intestinorum et ventriculi sanguine nigro, spisso injecta. 8) Vesicam urinariam urinis, intestinum Rectum faecibus expansa. 9) Vinculum spatio digitorum 2 transversorum supra bifurcationem in arterias Iliacas et digitii ius infra arteriam Renalem interposito, Aortae applicatum. — Aortam ipsam ab origine suā usque ad locum ligatum coagulo sanguineo, nigro impletam. Partem aortae infra vinculum positam etiam coagulo sanguineo infarctam. Tunica mediam intimamque sub vinculo ruptas; in loco rupturae istius lympham plasticam exsudatam. 10) Vasa venosa subcutanea sanguine nigro injecta.

In alterd ovi Aortam abdominalem, peritonaeo laeso, denudavi. Vinculum, ex 4 filiis bombycinis contortum, subduxii; extremitates ipsius 7 pollic. longas, ex vulnere propendentes, compressorio (a Bujalsky excogitato) alligavi; hoc eousque torsi, donec parietes Aortae ansa ligaturae arcte cinctos, pulsatione tamen in parte hujus arteriae inferiore adhuc manente, adnotarem. Quo facto vulnus conserui. Animal operatione fuita ambulabat, cibum sumebat. Torsionem ligaturae octo fere dies continuavi, omni tempore vinculum aquā humectans. *Symptomata*, quae tempore hoc animadvertisi, haec erant. Horis 30 p. o. transactis (quum tertia jam vice torsionem vinculi institerem) animal in extremitates inferiores decidit easque pone se trahebat; hanc ob causam

vinculum aliquantulum distorsi. Horis 45 p. o. elapsis animal jam denuo ambulabat, nullā extremitatum posteriorum manente paralysi; sed quum vinculum iterum torquere coepi (4 jam vice) animal iterum decidit et respiratio evasit difficilis, stertorosa. Torsionem vinculi paululum remisi et animal, horis nonnullis transactis, jam pedibus insistere, deambulare cibumque sumere vidi. Cor semper fere 80—85 vicibus per horae sexagesimam pulsabat. Spatio octo dierum p. o. elapsi, quum nonā aut decimā jam vice vinculum torquerem, motus extremitatum posteriorum debilitatos et vulnus externum sphacelo ac vermbus correetum inveni. Mors 12 diebus p. o. elapsis accidit. Urinam animal semper cum tenesmis emittebat, ultimis diebus anxiū ululabat, cibum tamen usque ad mortem sumebat. Vinculum tertia ante mortem die delapsum est.

Cadavere lustrato inventa sunt: *In cavo pectoris.* 1) Exsudatio nulla, pleura tamen ad attactum admodum humida. 2) Apex dia phragmatis costam 6am fere altitudine adae quans. 3) Consistentia pulmonum non alterata; pondus ipsorum non aductum, nisi lobum inferiorem et posteriorem exceperis. Sub cultro crepitabant. Color magis fuscus, in lobis posterioribus praesertim. Ex incisis pulmonibus compressisque sanguis niger, spumosus stillabat. 4) Cor magis contractum, quam dilatatum primo jam aspectu videbatur. Re vera tantummodo atria dextrarū sinistrumque nec non arteria et venae Pulmonales coagulis ex parte sanguineis, ex parte vero lymphaticis, albofla-

vescentibus erant impleta; in ventriculo autem dextro coagulum nigrum admodum exiguum, in sinistro vero nullum animadverti. Praesertim auricula atrii dextri coagulo lymphatico; albido, duriusculo, jam fere organisato et superficie ejus internae adhaerente, erat obsessa. *In cavo abdominalis:* 5) Exsudati serosi quantitas exigua. 6) Vascula textus subserosi circa vesicam urinariam et in regione lumbali sanguine expansa. 7) Omentum in regione vulneris referebat omnia inflammationis signa. 8) Vesica urinaria urinis erat extensa. Vascula ipsius subserosa etiam sanguine injecta. 9) Aorta ab origine usque ad locum ligatum coagulo sanguineo infarcta. Locus, quo vinculum applicatum fuerat, (ad digitos fere 3 transversos supra bifurcationem Aortae in Art. Iliacas), lymphà plastica et pure obtectus, sparsim sphacelo correpens. Superior et inferior extremitas, jam vinculo solutae Aortae coagulo sanguineo, duriusculo et cum intimè ejus superficie tenacissime cohaerente infarcta. Obliteratio tamen utriusque extremitatis Aortae non completa, etenim specillum in cavum ejus introductum, facile per locum ligatum exteriora versus protrudebatur. 10) Arteriae Iliacae sanguine nigro plenae. *Ex inferiore Aortae extremitate nullus eximus ramus egrediebatur.*

Phaenomena igitur, quae post sensim sensimque institutam Aortae abdominalis devinctiōnem animadverti, admodum differunt ab iis, quae repentinam hujus arteriae vincturam sequuta sunt; etenim in altero animali, dum vitâ adhuc fruebatur perinde ac in cadavere ipsius,

omnia inveni congestionum sanguinis ad cor et pulmones evidentissima signa, in altero autem parum perspicua, fere nulla. Ac profecto pulmo ovis experimenti 25, praesertim sinister, consistentiam et pondus exhibebat normalia, etianisi colorem habebat magis fuscum, quam qui in statu naturali solet esse. Ventriculi cordis etiam observabantur vacui et fere contracti, praecipue ventriculus cordis sinister; imo coagula, quae in atris inveni, volumine et proprietatibus prorsus diversis gaudebant; videbantur enim ex plasticâ lymphâ magis, quam ex sanguine conflata fuisse.

Experim. 27. In ovi trium fere annorum Aortae abdominali vinculum ex 4 filis bombycinis contortum, encheiresi in exper. 20 descriptâ usus, applicui. Vulnus conserui. Animal operatione finita surrexit. Usque ad diem quintam nulla perspicua orgasmi symptomata adnotavi; quum tamen diebus post operationem 5 elapsis, torsionem ligature sextâ jam vice instituisse, animal in extremitates posteriores decidit et nares fortiter dilatans spiritum anxie ducere ac in omnes partes jactari coepit, cor 110 vicibus per horae sexagesimam pulsabat. Vinculum nonnulli distorsi; horae sexagesimis nonnullis transactis omnia haec symptomata mitiora evaserunt, spatio autem horarum 5 elapso animal jam ambulabat cibumque sumebat. Hanc usque ad horam, hebdomadibus 5 post operationem jam transactis, vitâ fruierit. Cibum sumit, paralysis extremitatum posteriorum nulla; vinculum diebus post operationem 12 transactis delapsum est. Vulnus ipsum spar-

sim sphacelo et vermibus correptum per primam intentionem non sanatur.

Experim. 28. In ovi, duorum fere annorum, Aortam abdominalis extra peritonaeum denudavi. Vinculum ex 5 filis bombycinis contortum subduxii, extremitates ipsius ex vulnere propendentes, 7—8 pollices longas, compressorio (supra jam jam multoties commemorato) alligavi. Compressorium hoc torsi, donec parietes Aortae ansa ligature arcte circumdatos animadverterem. Animal solvi ireque sivi. Prosimuit, cucurrit. Torsionem vinculi, compressorii ope, continuavi. Filo jam ad dimidium contracto et in nodulos minutissimos convoluto, pulsatio in parte inferiore Aortae cessavit et animal illico in pedes posteriores decidit, paralysis harum extremitatum perspicua in conspectum prodiit. Spatio nonnullarum sexagesimarum horae partium transacto, vinculum sensim sensimque distorsi restitutaque in parte inferiore Aortae pulsatione animal iterum surrexit et cucurrit. Altera vice eadem ratione vinculum torsi, — eadem animadvertisi; distorsio tamen iterum vinculo animal non illico prosimuit, sed per aliquot temporis spatium humi jacebat atque motus extremitatum posteriorum perspicue debilitati observabantur. Sexagesimus vero nonnullis horae elapsis denuo currere coepit.

Periculis his annotationes quasdam adjiciam.

I.

Omnia, quae a me in cadaveribus ani-

malium, post vincturam Aortae abdominalis, observata sunt phaenomena ad haec fere rediguntur: 1) *Cor dextrum sinistrumque, venae Cavae, arteria venaeque Pulmonales* nec non *Aorta ipsa*, ab origine sua usque ad locum ligatum, sanguine nigro et coagulato plena. 2) *Pulmones* et praesertim lobi ipsorum posteriores et inferiores colorem et consistentiam exhibebant non naturalem. In universum color pulmonis flavidofuscus, interdum liquidus, pondus autem aductum observabantur. Saepe etiam compressos, columnae vertebrali approximatatos et *diaphragma in cavum pectoris* nimie protrusum, animadvertisi. 3) Interdum in *cavum pleurae et peritonaei* exsudationes serosanguinolentas. 4) Totum *sistema venosum abdominalis* sanguine spiso nigro expansum. 5) *Peritonaeum intestinaque* in statu normali. 6) *Vesicam urinariam* uruis, *intestinum Rectum* faecibus extensa. 7) *In cerebro et medullā spinali* interdum nonnulla congestionis signa.

II.

Ut in vincturā Aortae abdominalis encheiresis, a me excogitata, prosperum obtineat successum, tres res necessariae statuenda mihi videntur: 1) Continuetur nimirum torsio vinculi *per spatium saltem hebolmadis unius* sensim sensimque. 2) Ante quamque torsionem *vinculum madidum* fiat et 3) *Saltem ex 4 firmissimis filis bombycinis* contextatur necesse est.

III.

Experientiā constat lumine omnium rāmorū arterialium lumen truncī ipsius superari. Sed in variis animalib[us] gradus, quo lumen ramorum truncī lumen superat, varius esse videtur. Patet igitur et impedimentum, quod sanguis, vincturā Aortae abdominalis factā, offendit, in diversis animalib[us] pariter esse diversum. In felibus, canibus aliisque minori statuā praeditis carnivoris capacitas ramorum arterialium videtur multo magis Aortae ipsius capacitatem superare, quam in vitulis, ovibus aliisque herbivoris; hanc ab causam et operatio ipsa vincturae Aortae abdominalis in prioribus eventum magis faustum habet, quam in posterioribus animalib[us] instituta.

IV.

Ex 1. 2. 21. 22. et 23. periculis patet, vim et rapiditatem, quā circulatio collateralis post vincturam Aortae abdominalis restituitur, multum differe. Etenim in cane, vitulo et ovi (exper. 1. 2. 22.) nonnullis horae sexagesimis sexcentesimis partibus transactis, in agno autem (exp. 21.) ex toto non restitutam hanc circulationem animadverti.

V.

Consuetum medullae spinalis incitamentum, per vincturam Aortae abdominalis deletum, causam esse paralyseos extremitatum inferiorum, (vid. pag. 43) probare videntur difficiles urinæ et faecium emissiones, quæ post hanc

operationem saepissime oriri solent, nec non vesica urinaria urinis, intestinum autem Rectum faecibus post mortem extensa. Causa vero, cur exitus periculorum a me institutorum differunt ab illis, quos cel. Legallois ex proprio experimento animadvertisit, videtur eo niti, quod in meis periculis vasa collateralia ad medullam spinalem incitandam sufficientem adhuc sanguinis copiam adportabant; et re vera in experim. 21, quum Aortā abdominali devinctā, circulationem collateralē non restitutam invenerim, nullas etiam contractiones spasmoidicas in extremitatibus inferioribus ab incitatione medullae spinalis observavi.

Animadvertisendum insuper est, effectus, quos exhibent experimenta 14, 15, 16, a me instituta, forsitan et propter has rationes ab illis cel. Legallois differre, quod: 1) Iste illustrissimus Indagator XV. horae sexagesimarum spatio, post vincturam Aortae, elapso, medullam spinalem destruxerit (vid. pag. 44), ego vero idem fecerim, vix octo horae sexagesimis post hanc vincturam transactis, paralysi extremitatum posteriorum nondum forsitan obortā; dein 2) Cel. Legallois ad Aortam denudandam musculos abdominales transciderit, ego vero in exper. 14 et 16 Aortam ex latere denudaverim columnamque vertebralem, relictis abdominalibus musculis, persecuerim. Nemo igitur non vedit in periculo a Legallois instituto anastomoses Mammariarum internarum cum arteriis Epigastricis destructas, in nostris vero experimentis intactas remansisse. Geterum nescio, cur

Vir illustrissimus contractionum in extremitatis spasmadicarum defectum paralyseos medullae spinalis certum esse signum existimet? Profecto experientia docet paralyses *ad peripherid ad centrum* (vid. pag. 44) perinde ac *ad centro ad peripheriam* propagari posse. Nunc post Aortae abdominalis devinctionem, quum scilicet circulatione capillari deleta, fines Ischiadicorum Cruraliumque nervorum incitamento carent, vis muscularum cruris et sensibilitas debilitentur necesse est. Pone itaque paralysin extremitatum inferiorum, in casu de quo agimus, in his minutissimis nervorum surculis finibus que sedere, num revera tunc temporis incitatio medullae spinalis, etiamsi ipsa in statu normali maneat, muscularis extremitatum communicetur ac contractiones fibrarum spasmoidicas excitet?

VI.

Notatu dignum est, phaenomena, quae in cadaveribus, Aortâ abdominali ligata, observantur, secundum variam corporis animalium organisationem discrepare; sic e. g. in ovibus semper laticem serosum in pleurae et peritonaei cavitates quantitate non exiguâ exsudatum, in canibus vero nullum fere inveni.

Restat, ut publice me gratum profitear Studdioso Medicinae Georgio Schultz, Esthono, qui in instituendis periculis semper me manu et consilio adjuvabat et cuius solertiam, in rebus hisce gerendis sufficienter laudare haud possum.
